

LE MIROIR

DV TEMPS PASSE,

A L'USAGE DV

present.

A TOVS BONS PERES

*Religieux, et vrais Catholiques non
passionnez.*

La Transmontaine Faction,
A fait par Subtil monopole,
Du manteau de Religion,
Vne Roupille à l'Espagnole.

THE MUSE

OF THE

ARTS

AND

SCIENCE

OF

THE

AMERICAN

REPUBLIC

OF

THE

UNITED STATES

OF AMERICA



ADVERTISSEMENT AV LECTEUR.

C'EST vn fait̃ estrange de ce que l'homme remue
naturellement toute chose pour paruenir à la cognois-
sance de la verité, & neantmoins si tost qu'elle se presente à
luy il ne la peut souffrir: de sorte que se voyant ainsi re-
butée d'un chacun, il y a grand sujet de croire avec plu-
sieurs celebres personnages, qu'elle s'est tout à fait̃ retirée
dans le Ciel en despit de la malice des hommes: c'est pour-
quoy les bons PP. Capuchins, & autres vrais Anachoret-
tes sont tres-aisés de faire banqueroute spirituelle à ce
monde affronteur, à fin de mediter plus innocemment avec
elle en son diuin séjour.

Mais d'ailleurs il faut remarquer aussi que ces deuots
Religieux sont dignes de compassion, de se voir à toutes
heures distraits d'une si sainte occupation par les discours
affectez de certains zelez indiscrets, & par les visites im-
portunes des faux-pieux Cabalistes, qui comme Oiseleurs
subtils decoient ces Religieuses personnes, auxquels ils
font voir l'ombre pour le corps de ceste Vierge celeste, &
sous vne deuotion simulée de guarir l'heresie, les iettent
plus auant que iamais dans les confus embarras des negoces
du siecle: iusques à les faire quitter le repos de leurs Cloi-
stres pour trotter dans le monde, & les fourrer parmy les
Cours des Princes, sous couleur de travailler au secours de

*L'Eglise: Ces astucieux bigots introduisans par ce biais ces
simples ames pour servir de plausibles instrumens à leurs
pernicieux desseins, faisant semblant de leur mettre es
mains des remedes salutaires pour consolider nos maux,
lesquels toutesfois sont beaucoup plus dangereux que la
maladie mesme, d'autant qu'estans Empiriquement pre-
parez au desceu du souverain, & mespris du magistrat, ils
ensorcellent manifestement les esprits, les corps, & les vo-
lontez des pauvres paralitiques François, auxquels ils bou-
leversent la cervelle des Meditations chamarées de Reli-
gion, pour piper plus accortement les idiots, & jeter nostre
Estat dans les affreux gouffres d'une continuelle confusion
Ainsi par une venale perfidie & trop niaise credulité qui
nous sert d'apas, nous courons de nous mesme à nostre rui-
ne, abandonnant nostre Monarchie à la mercy de nos nou-
veaux amis simulez: mais en effect anciens ennemis iurez,
le tout au grand mespris des fideles allies de cette Couron-
ne: Et qui est encore de plus lamentable en ce malheur, c'est
qu'on attribüe à crime d'en faire cognoistre les erreurs,
voire c'est aujour d'huy une espee d'heresie d'en parler
seulement.*

*L'extreme regret pourrant qu'ont les ames candides &
vrayement Catholiques, de voir que cette fausse pieté s'est
glissée bien avant dans les Cloistres, pour infecter de son
venin les esprits plus bontifs, iusques à les divertir de leurs
Religieuses occupations pour les intraduire dans le Louvre,
afin d'y debiter plus officieusement leurs danrées pourries:
Tout cela, dis-je, a encouragé aussi plusieurs gens de bien à
rompre leur silence pour aduertir les François de ce qui se
passe, & redire les choses que nous devrions auoir oubliées,
si nous estions si sages que d'oublier quant- & quant les fa-
nestes pistes de nos Zelez indiscrets, qui ont seruy, & qui*

seruent encore d'amorce pour atraper les mal-aduisez
Francois.

Et c'est ce qui m'a animé en mon particulier de deschiffrer icy nos publiques erreurs, par ce discours que i'adresse à tous les Ordres des vrais Religieux, lesquels nous auons veu auoir esté les premiers trompez, avec beaucoup de simples Catholiques, tant par l'artificieuse cautelle des Catholiques composez de la drogue estrangere, que par les inductions de certains Predicateurs plus garnis de Theologie sophistique, que de Sagesse & prudence Chrestienne.

Nous deuons cela par charité reciproque à ces bons Peres contemplatifs, & aux simples Francoiſ, de leur faire scauoir les piperies du temps, tout ainsi qu'il nous sont participans de leurs meditations celestes: mais auant que de passer plus outre, il est à propos de considerer icy vne chose deplorable en la condition des hommes, à scauoir que Dieu leur ayant donné la Religion & la raison pour en bien vser, ils la conuertissent neantmoins pour la plus-part en faction & malice.

Qu'ainsi ne soit, combien y a-il de faux pieux au monde qui font auourd'huy vn trafic honteux, & vne cabale dangereuse de leurs feintes deuotions? Que si par vne stupidité lasche nous les voulons dissimuler dauantage, les pierres les renelleront à la fin, estant à croire que Dieu ne souffrira plus longuement que l'on abuse si manifestement de son saint Nom, pour commettre plus finement des trahisons.

Ie vous allegueray à ce propos ce qui arrina il y a quelque temps à vn simple Religieux qui racomptoit par merueille les feruentes deuotions d'vn certain Courtisan qui recitoit tous les iours son Breuiaire, sans y estre obligé, auoir en sa chambre vn benoistier, & vne discipline en son cabi-

net; celuy qui l'escontoit luy repartit sans s'esmouoir,
Qui aussi estoit-il besoin de grandes demonstrations de
pieté à ce personnage là qui estoit tenu pour vn des plus
grands fourbes de la cour, & auquel à la verité il failloit
bien de l'eau beniste pour se lauer des prodigieuses perfidies,
esquelles ils auoit trempé. Ce bon Pere se trouua estonné
comme vn fondeur de cloches d'une si inespérée repartie,
d'autant qu'il croyoit en son ame que ce Courtisan dont il
parloit fut vn Demybeat qui vescu saintement suiuant
les demonstrations exterieures de ses saintes deu-
tions.

On peut voir par ce recit, comme les simples Religieux
qui ne sçauent que par rapports, & qui ne voyent que par
les yeux d'autry, sont faciles à decouoir. De mesme vous
ne serez moins estonnez quand on vous fera toucher au
doigt, que beaucoup de charlatans d'aujourd'huy, de faus-
saires, maltantiers, concussionnaires, & brouillons d'Estat.
font honte aux plus gens de bien en matiere de cas de con-
science, & de catholicité, telles gens estans curieusement
punctuels de se monstrier les premiers aux Sermons, à l'eau-
beniste, aux quarante heures, & aux Monasteres nouveaux;
car c'est en tels lieux qu'il se faut principalement faire
paroistre, qui veut acquerir reputation d'estre Seraphi-
que zelé: Tels garniments ayans à toute rencontre le nom
de Dieu en la bouche, & ne parlans que de probité, bien
qu'autres dans le cœur.

Tel estoit dans Paris durant la Sainte vniõ le zelé
Procureur, Bussy le Clerq, qui emprisonna le Parlement,
& fit pendre catholiquement le President Brisson: Tel
estoit vn zelé Battelier de Rouën, qui commandoit dans la
forteresse du vieux Palais: Tel vn soldat de fortune appel-
lé saint Paul, fils d'un Tisseran, qui se rendit si absolu

dans la Champagne, que Monsieur de Guise de present fut
contraint de le tuer de sa propre main pour viue en as-
seurance dans Reims: Tel un Tripotier d'Amiens, nom-
mé Haret, qui seruit de principal instrument à l'Espa-
gnol, pour surprendre cette ville, Tels en sommes tous les
notables zelateurs qui commandoient es Conseils des bon-
nes Villes durant la Sacro-saincte Ligne derniere. Et au-
jourd'huy on ne surprend quasi plus d'insignes Maque-
reaux, Coupeurs de bourses, & Filoutiers, qu'on ne les
trouue garnis du cordon saint François, du Scapulaire de
la Mere Therese, & de grands chappelets emmedaillez:
de maniere qu'estans surpris dans leur larcins, on seroit
quelquesfois contraint de leur faire amende honorable, si en
les despoillans on ne leur trouuoit aux espaules d'autres
stigmates de deuotion, portant les fleurs de Lys au dos,
comme font nos desnaturez Renegats de la Patrie, que la
fausse piense Cabale leur arrache du cœur, pour les reiet-
ter deuotement en arriere.

Voilla, Messieurs, comme sous apparence de Religion,
les Hypocrites attrappent les ames Columbines, lesquelles
pour n'estre prudentes comme serpens, se laissent piper aux
apeaux des méchans qui tonnellent ordinairement les in-
nocens: De façon que ce ne sera peu de charité de les af-
franchir du Loup-garon de telles pippetries, en ce que pour
n'auoir recogneu cette verité, les superstitieux prennent
vne extremité, & les schismatiques vne autre, sans de-
meurer es termes de la raison, quand il est question de de-
fendre la Religion & sa Patrie tout ensemble. Et c'est ce
qui a causé vne effete de Schisme entre les Catholiques
mesmes, faite de comprendre que les choses bonnes faictes
mal à propos, deuiennent mauuaises, & que le zele indis-
cret n'est quelquesfois moins dangereux, qu'une opinion ar-

gonée, ainsi qu'il se pourra voir clairement par la suite de ce discours.

Or au lieu de continuer à prouoquer l'ire de Dieu par tels Cabalistes deportemens, l'unique remede, Messieurs, en vn si corrompu siecle, est d'inuoker la bonté diuine, à ce qu'il luy plaise regenerer tout vray Catholique en son amour, & ramenans les zelex indiscrets à la charité de leur Patrie, les faire fraternellement reuenir à l'Hostel, & les Schismatiques à l'Autel, qui est le seul but que doiuent auoir tous les gens de bien & bon François: Autrement soyons asseurez que l'Estranger triomphera en bref de nostre Monarchie, & de nostre liberté tout ensemble.



LE MIROIR

DV TEMPS PASSE,
A L'VSAGE DV PRESENT.

*A tous bons Peres Religieux, sequestrez
du monde.*

MES PERES, Pour autant que ne pouuez que
tres-difficilement estre informez au vray
du flux & reflux des negoces de ce mōde, pour n'e-
stre d'ordinaire visitez en vos Cloistres que par
gens qui vont à la bonne foy comme vous, ou par
des Casuistes qui se veulent preualoir de vostre
pieté, ou par des Espiegles Courtisans, lesquels ne
vous disent pas tousiours ce qu'ils croient, & en-
core moins ce qu'ils pensent, desguisans bien de-
uotement à l'abry de vostre innocence leurs
actions passées, leurs intentions presentes, & leurs
machinations futures, selon les diuers desseins
qu'ils proieettent de suivre en vn si desguisé siecle.

C'est pourquoy ie vous supplie recevoir sans
scrupule ce naïf & veritable D'scours, lequel ie
vous adresse comme vn preservatif contre les
Mathoiseries qui voguent à present, le tout sans
autre intention que pour desabuier les plus sim-
ples d'entre vous, qui se pourroient encore laisser
seduire sans y penser, par les zelees persuasions
des sublimes Mercurialistes de ce temps, auxquels
i'espere faire cognoistre par la suite des erreurs
passées, qu'il y a vn grandissime Cahos entre les

iugemens de Dieu & les iugemens des hommes, des vrays Catholiques & des fins cagots, des choses sacrées & les prophanes, des grands & des petits, à raison des diuerſes paſſions qui les preoccu- pent, beaucoup de gens ne ſuiuāſ aujourd'huy que le Party à la Mode, c'eſt à dire, celuy par le moyen duquel ils penſent pluſtoſt faire leur fortune, où bien iugeants aueuglement des affaires courātes, ſelon la portee de leurs bigarées imaginations.

Certes, la rencontren'eſt pas mauuaſe de celuy qui diſoit, que les anciens & modernes Philoſophes ne ſont tāt ridicules en la perplexité de leurs araiſonnemēs, ſur la queſtion de la face qui ſe void dans le rond de la Lune, qui ſont les Coloques de quelques ſophiſtes Docteurs, ſimples Religieux, Pedāts, Predicateurs, & autres pieux diſcours, ſur le reſultat des intereſts, ou deportemens des Papes, Roys, Potentats & Republiques.

Apophtegme tres-remarquable, ſuiuant lequel on peut dire auſſi, qu'il n'y a pas grand offence de croire, qu'ēs conſeils de de-là les Monts, qui excitent les vents dont naiſſent les tempeſtes dans noſtre Eſtat, & dans nos ames, on deffere pour le moins autant aux Maximes de l'Ancien Numa, qu'aux preceptes du Numen Eternel, quoy que vous puiſſent deſguiſer du contraire quelque Padre Iacinthe, ou fray Dominigo de Ieſus Maria, ou vn Auditeur expectant, leſquels y ſont les premiers trompez, *Dum decipiuntur decipiunt & alios*, Le faux Dieu intereſt, eſtant le Dieu qu'encenſent bien ſouuent la pluſpart de cēs Catholiques Caſuiſtes modernes; Ce que ie vous repreſente, mes Peres, afin que vous vous deſiſtiez deſormais d'ac-

cuser nos Roys, Messieurs leurs Ministres, leurs Parlements, & leurs Aduocats generaux, quand ils conseillent autrement que vous vous estiez imaginé, & quand vous voyez que Dieu destruit en vne heure tous les pieux monopoles, que la Cabale estrangere vous auoit fait concerter en dix ans, avec des caprieuses radoubleures de pieté, au desauantage de vostre Patrie, & bien souuent de la Religion mesme.

Or il est bon de noter icy, que les Religieux tâtentent que portans besace, font aujourd'huy sans hyperbole vne bonne partie du Royaume, principalement depuis la mort deplorable de Henry IV. & d'autant que le Prouerbe est tres veritable, qui dit, que l'une des parties du monde ne sçait comme l'autre vit, il est necessaire de deffiler les yeux à telles gens, lesquels avec les Catholiques simples & corrompus qui font vn autre grand Corps, ont fomenté & fomentent les erreurs sur erreurs que l'on a vëu, & qui se voyent encore, & qui ont causé & causent la diuision entre les Catholiques mesmes, le tout faute d'auoir cognu l'intention & les ressorts de la Cabale estrangere: Car il faut que vous croyez tous pour constant comme article de foy, que depuis soixante ans en ça, il en a tousiours regné vne occulte parmy nous, qui conuertissant de iour en iour nostre Religion en dangereuse *Faction*, ne s'estudie qu'à nous entretenir dans la confusion, & à fasciner par vn specieux pretexte, l'ardent zele des trop credules François, tout ainsi qu'elle sceut dextrement apaster la deuotion des bons Bourgeois d'Amiens avec dix noix, tandis que le Docteur Filsac leur preschoit le Careme.

4

Escoutez donc sans desgoust, mes Peres, quelques particulieres erreurs, ou zele sans science, qui ont fait delinquer la pluspart des plus pieux, afin que recognoissans le mal contagieux, on le puisse methodiquement guarir, & eluiter d'y retomber à nostre confusion.

Je commenceray par vne remarque moderne, arriüée du temps d'un Fauory de nostre siecle, deuant lequel haranguant un bon Pere flateur, & voulant resueiller les Parisiens, s'exclama pieusement en ces termes; *Chrestiens auditeurs, on diroit quelquesfois que nostre Dieu s'endort, ainsi que l'interpelloit iadis le Prophete David par ces paroles, Domine, quare obdormis, de mesme qu'il sembloit que Dieu eust sommeillé iusques aujourdhuy: mais par grace speciale qu'il s'esueille en suscitant à la France un si bon Catholique comme estoit ce genereux seigneur.*

Le zele de ce naïf Predicateur le faisoit ainsi parler, ne preuoyant pas que ce Fauory ne contrefaisoit le bon Chrestien que pour s'establir en la bien-veillance de la populace. Aussi à ce discours les iudicieux assistans haussioient les espauls en baissant la teste; mais les simples pieux tressailloient d'aïse, s'imaginans des ja de voir l'Herésie par terre, & la Palestine reconquise sur le Turc.

Vn autre Pere preschant encore deuant le mesme Fauory, qui estoit lors accompagné des plus grâds de la Cour, lesquels neaumoins reprouuoient les hauts desseins de ce champignon, dans lesquels ils preuoyoient indubitablement la ruine de la France; nonobstant ce Iesuite ne laissa de l'esleuer iusques au Ciel, & de fulminer passionnément des Anathemes, contre ceux qui sous pretexte d'estre

bons François, auoient plustost des plaintes en la bouche pour deplorer la perte de l'Estat, que celle de la Religion, & qui alleguoient à tous propos qu'on ne pouuoit faire la guerre aux Heretiques qu'en acheuant de ruiner le Royaume, & que c'estoit l'opinion de tous les bons François; voilà le jargon des Politiques de ce temps, disoit ce deuot personnage, mais que ce n'estoit pas l'aduis des bons Catholiques, ce qu'il repeta plusieurs fois coup sur coup, lesquels mots bien entendus ne signifioient autre chose en langage zelé, que des bons Espagnols: Aussi quelques vns de la confrerie, des Maheutres susvroient entre les dents, que cette zelante boutade en faueur d'une hapelourde, resentoit encore bien fort son lenain de la Sainte Ligue, & le remugle de la vieille Cabale; O bon Pere! si vous n'estiez si estroittement lié à l'obedience au eugle, on vous eut bien reparty sur le champ, qu'il faut, il faut éuiter telles amphibologies, comme tres-dangereux equiuoques.

Ce monstre de faueur promettoit à la verité aux Zelottes vn siecle Catholicissime, asseurant quelque credules Docteurs de remettre l'Eglise en sa premiere splendeur, faisant en sorte qu'il n'y auroit plus qu'une Religion en France, introduisant par ordre de la Caballe des Iesuites par toutes les villes, iusques à restablir leur College dans Paris, contre les Arrests du Parlement, captiuant aucuns Religieux par visites, les Predicateurs par gratifications, les pieuses Casuistresses par bons accueils, & les Prelats par beaux complimens: de sorte que tous quittoient le Roy & son seruice, pour courir apres ce nouveau Iosué, *fatali omnium ignavia*, qu'on

6
appeloit autrefois à la Cour, Coyōnerie Frāçoise.

Or estant aduenu la mort miserable de ce fauor-
ry: qui se faisoit desia adorer par nos Zelez, plu-
sieurs d'entre eux ont bien osé publier sous main
que l'Eglise auoit fait vne grāde perte en sa persō-
ne, bien qu'il soit notoire à vn chacun qu'il n'eust
iamais afection au bien public, ny à la Religion, &
de faict le bruiet a esté tout cōmun qu'il s'enten-
doit sur la fin avec le Chef des Huguenots, auquel
mesme il auoit presté de l'argent durant la guerre
ciuile.

Voila vn exemple moderne d'erreur, mes Peres,
dans lequel la pluspart d'entre vous ont innocem-
ment trempé, sans sçauoir le bien & le mal qui en
pouuoit reüssir, que par les imaginations d'autrui.
Dans le mesme labyrinthe d'aveuglemēt, on vous
a veu autresfois extrauaguer à tatōs, sur les affaires
de Sauoye, tant durāt qu'apres la Sainte Vniō. Les
bien-sensez pressioient Henry III. d'auoir raison de
• Vsurpation du Marquisat de Saluces, comme de-
puis Henry IV. son successeur la faict: mais les faux
& idiots Zelants vouloient par erreur zelee qu'on
attendit qu'il n'y eut plus de Huguenots en Frāce,
deuant que de faire la guerre à vn Prince Catho-
lique, quoy que l'on vit en ce temps-là, la Courō-
ne des Lys foulée aux pieds du centaure de ses du-
catons. Et notez, mes Peres, sans neantmoins vous
mettre en colere, que pareil jargon se tient encore
aujourd'huy par plusieurs d'entre vous, lesquels
soustiennent que le Roy ne se doit engager d'assi-
ster ce Prince, qui est à present nostre allié, n'y s'o-
poser aux vsurpations que l'Espagnol fait dans l'I-
talie, & Alemagne, iusques à ce que sa Majesté ait

pris la Rochelle, & exterminé tous les Heretiques du Royaume auparauant: qui est en effect le mesme langage des anciens Ligueurs, dans lequel on retombe sans y penser. C'est pourquoy les bons Religieux se doiuent garder de discourir ainsi à tort & à trauers des affaires d'estat, ou ils ne voyent gouttes, & encore plus de censurer les resolutions que les Ministres du Souuerain prennent sur icelles, attendu le cōtrepied qu'on est cōtraint de prendre biē souuēt pour sortir d'un mauuais boubier.

Chacun sçait comme durant la Ligue, le Connestable Desdigueres lors Huguenot a guerroyé le Piedmont: cependant on a veu depuis ce temps là ledit Seigneur appelé, & receu dans Turin avec applaudissement par le Duc de Sauoye, quoy que de Religion contraire, & autrefois son grand ennemy. Mesme le secours d'Angleterre imploré par ce Duc Catholique contre les fraternelles oppressions du Roy tres-Catholique des Espagnes, & ne faut point douter que les simplifiez Religieux n'ayent commis là dessus en leurs gloses extraordinaires d'estranges comminations, & perplexitez d'erreurs par des argumens pieusement cornus: iusques à ce qu'ils ayent esté ramenez au silence par l'heureuse Catastrophe de cette Tragicomedie d'Estat, terminee par nostre saint pere le Pape, par Louys XIII. Fils aîné de l'Eglise, & par des alliances saintes.

Resouuenez-vous aussi, s'il vous plaist, des faux bruits que la Cabale faisoit trotter de cloistre en cloistre deuant le deceds lamentable de Henry le Grand, sur le sujet de la protection de Iuliers, bien que commencee dès le regne de François I. que

n'a ton pas dit contre la glorieuse memoire de ce sage Roy, & en suite sur les appareils d'un pretendu blocus sur Geneue, assiegee en imagination par l'armee Espagnolle, afin d'y planter la Foy, iusques à susciter par toutes les villes de ce Royaume, des simples Religieux, pour publier *piomendacio*, comme on faict encore à present, que deux de nos Princes vraiment plus Catholiques que leurs Cabalistes, auoient dessein de se jeter dedàs pour la defendre au cas qu'on entreprit de l'attaquer, à quoy ils n'auoient nullement pensé, ce neantmoins ils ne laisserent de semer ce bruit par les Conuents, le tout en intention de vilipender la France.

Que n'es-t-il pas dit encore pour descrire la proposition, que quelques vns auoient fait durant la Regence de la Reyne Mere, du mariage de Madame, avec le Prince d'Angleterre? Combien d'ames zeleees ont abhorré cette alliance au sujet de l'heresie: Cependant chacun a veu comme le Catholique Roy d'Espagne la chaudement rechercher, & le Pape mesme la autorisee. Pourquoi donc veut-on rendre nostre condition pire que celles de nos voisins? Et pourquoi trouue-t-on mauuais en nous, ce qu'on trouue bon en d'autres? Si ce n'est pas la malice de la caballe ennemie, à laquelle nous nous laissons duper.

Considerons icy vn autre exemple d'erreur, ou de malice tout fraichement arriué sur le sujet de la mortalité suruenüe dans le conuent des Capucins de Calais. Il n'y a aujourd'huy personne dans le Royaume qui n'aye entendu dire que cet accident auoit esté enfanté par l'inuention d'une bouteille de vin empoisonnee, que quelques vns auoient donné

donné à ces bons Religieux, desquels quatorze moururent soudain qu'ils en eurent beu. On en a veu vendre la representation en taille douce, & la crier publiquement sur le Pont-neuf, à Paris, & par tout ailleurs dans les villes du Royaume. Cependant la verité est qu'un de ces Peres auoit apporté la peste du Conuent de Doué, qui en suite auroit frappé tous les autres de la contagion. Le Gouverneur de Calais l'ayant ainsi mandé au Roy, & le Maire de la ville certifié, après auoir mis ordre à faire aërier la maison, & fait medicamenter quelques autres Religieux qui restoient malades: A quoy donc bon ce stratageme de semer parmy la populace un bruit tout contraire à la verité, si ce n'est à dessein d'animer les esprits les vns contre les autres, & par vne mauuaise impression les porter à la mutinerie contre ceux qui n'en sont pas coupables, voire qui n'y ont seulement pensé. Tout cela est contre la charité Chrestienne, & n'y peut auoir un bon zele de Religion.

Je produirois icy vne centaine de telles impertinentes erreurs, mais l'exemple de nostre Sainte Vnion derniere est le plus demonstratif, nous en auons veu la naissance, le progres & le succez à nostre confusion; Et si le bon Conseil du Roy ny remedie, possible que la France n'est pas hors du danger d'en voir renaistre vne seconde, pire que la premiere. Et pour ceux d'entre vous, mes Peres, qui ne l'ont veüe, ny osé lire, ny croire ce qui en estoit, voycy ce qui s'en est recueilly de plus certain, & qui merite bien d'estre considéré, afin de ne retomber si facilement en pareilles miseres, sous des pretextes si specieux que ceux qui sont masquez de Religion.

Tene toucheray point pour l'heure sur les hauts intellects de la caballe estrangere qui agissoit en ce temps là, parmy les ames Françoises Catholiquement Espagnolisées, par la drogue du Peru, craignant d'esblouir les simples Nouices. Il me suffira de vous dire, mes Peres, qu'un bon Iesuite en apporta la premiere semence de delà les Monts, croyant en son ame Apostoliser Henry III. tout porté au zele le receut tres fauorablement, mais le Parlement de Paris, qui par sa longue experience scait penetrer les abysses de telles negociations, s'apperceut qu'on auoit baillé à ce pieux Pere, au lieu de graine de bons choux fleurs, de la belle graine de moustarde, laquelle par sa ressemblance prendroit infailliblement (comme de fait elle prit) les credules François au nez: C'est pourquoy il decreta prise de corps contre ce bon Religieux, appelé Bernardino Castorio, & contre le sire Thomas Brumez Libraire luré de l'Vniuersité, qui furent assez longuement prisonniers dans la Conciergerie du Palais. Dieu scait si ce fut sans crier à la persecution, iusques là, que certains Predicateurs declamerent à toute ouurance contre ce venerable Senat, qu'ils appelloient auteurs d'heretiques, & Machiauelistes, Maheutres, ainsi qu'auparauant les pretendus Reformez, notez, mes Peres, les auoient baptisé Politiques, par vn liure qu'ils firent contre le Parlement.

Or il vous faut scauoir que l'instruction de ce bon Padre Iacinto, ie veux dire Bernardino Castorio, ne contenoit autre chose, Qu'une exhortation à tous les Catholiques de s'vni ensemble, & faire par tout des prieres publiques, pour appaiser l'ire de Dieu. Il ne se peut rien dire de plus specieux.

que cela : Ce qui fit que le Roy Henry III. com-
mença mesme des premiers par des processions de
Penitens blancs & bleuz. On le veid aller de Pa-
ris à Nostre Dame de Chartres à beau pied sans lan-
ce, en habit de Penitent, & reuenir de mesme, en
temps d'Hyuer, ayant par fois l'eau iusques aux ge-
noux, à cause du desbordement des riuieres : Les
Euesques, Religieux, & Peres Capucins qui l'ac-
compagnoient, & ceux qui viuent encore peuuent
tesmoigner si ce bon Prince faisoit cela par hypo-
crisie, ainsi que les faux François le publioient sous
main ; iusques-là, qu'il elchappa au Pape Sixte
cinquesme, de dire, que le Roy de France faisoit
tout ce qu'il pouuoit pour deuenir Moyne, & que
luy Pape faisoit au rebours, tout ce qu'il pouuoit
pour deuenir Roy : Voyla comme il estoit des-
chiré de tous costez, par ceux qui se moquoient de
ses veritables deuotions.

Ce bon Roy fit encore vn autre pelerinage à no-
stre Dame de Boulongne de Long-champ, ou ses
plus familiers allerent pieds nuds, quoy qu'il fist
froid & fangeux, entre lesquels estoient les Com-
tes de Torigny, du Bouchage, & beaucoup d'au-
tres: Les peuples aussi firent de tresbelles & nom-
breuses Processions blanches, ordonnees, disoit on
pour l'extirpation de l'heresie, le saint Sacrement
y estoit porté trois, quatre, cinq & six lieues loing,
hommes, femmes, filles, & garçons, estans tous re-
uestus d'Aubes blanches portans chacun vne Croix
en la main, & chantans piteusement par Monts, &
par Vaux, *Aue Maria Domini mei*, &c. puis le Kyrie
eleison.

En tout cela mes Peres, il n'y auoit que toute

saincteté & pieté , tout ainsi qu'au dessein de la
Congregation, dela Propagation de la Foy, qu'on
essayé d'introduire auourd huy pour conuertir les
Heretiques : mais quand en suite, les iudicieux
s'apperceurent que selon la preuoyance du Parle-
ment, la Cabale auoit tiré du liure du bon Iesuite
Bernardino, le Prelude de la Tragedie qui s'ensui-
uit par ce tant specieux Manifeste de la Sainte
Vnion. Ils virent aussi tost vne generale inonda-
tion d'armées Françoises & Estrangeres par tout
le Royaume, le sang respandu par ces erreurs à la
bataille de Coutras les baricades de Paris, l'action
de Bloys, le parricide de saint Cloud, le combat
d'Arques, la defaictte d'Yury, l'horrible famine de
Paris, la surprise d'Amiens, la perte de Cambray,
le sac de Dourlans, les Eglises & Monasteres ab-
batus par les mains des plus affidez Zelottes, les
saccagemens des villes & fauxbourgs, les Parle-
mens trainez par des maraux, les vns à la mort, les
autres aux prisons, ou en exil. Ne vous en ressou-
uiuent-ils plus, Messieurs les Zelez ? Et au partir de
là, les Aubes blanches de nos ardents pelerins con-
uerties en casaques, cuirasses & corcelets, les
Croix en halebardes & mousquets, & l'*Aue Maria*
Domini mei, en ces furieux mots, qui viue ; mort,
chair, &c. Et d'autre costé les Malheutres, Realis-
tes, Gautiers, Chastillonnois, lipans, trainoient
apres eux vne Iliade d'horribles desolations. Adonc
plusieurs simples Zelez avec les vrais Catholiques
commencerent à se rememorer des sages aduis du
Parlement, & admirer la preuoyance de ces grands
Senateurs, lesquels preferans, (comme font encore
les prudents Ministres du Roy.) la tranquillité de

l'Eglise, & de l'Estat à leur propre repos, auoient
esté persecutez, ainsi qu'ils sont encores à present,
pour s'estre opposez aux erreurs populaires, &
pour auoir osé auertir que la France eust à preuenir
les Catholiques rauages qui se preparoient sous
tels escueils, pour engloutir plus aisément les vns &
les autres. Ce qui doit seruir aux François d'une
docte leçon, laquelle nous deuons bien estudier
tous les iours, si nous n'auons enuie de retomber
dans les mesmes pieges & calamitez.

En suite de ce que dessus, il est bon de remarquer
encore, qu'un peu auparauant ces zelées émotions,
Philippe second Roy d'Espagne; qui deuoit payer
les Menestriers de la feste, & les cousteaux de la Tra-
gedie, (comme son petit fils est encore tout prest de
faire, si les François luy veulent donner la main) auoit
faict un riche present à l'Abbaye de saint Denis en
France, d'une grande lampe d'argent, en recognois-
sance d'un Reliquaire de saint Eugene qu'il auoit
impetré du Conuent, & auquel il disoit auoir une
grandissime deuotion. Le premier President de
Harlay, notez cecy: mes peres, fut d'aduis avec quel-
ques Conseillers de supplier le Roy, que cette lampe
fut fondue pour conuertir en quelques Ornemens
ou autre embellissemens de ce Monastere, & sur tout
qu'elle ne fut point pendue en un lieu eminent, crai-
gnant, comme il aduint, & aduiendra encore, si on
ny prend garde de bien pres, que le credule peuple de
Paris, qui court tousiours apres la nouveauté, allast
à la foule en procession adorer cette digne lampe,
au preiudice du Souuerain, pour l'amour de ce bon
Roy Catholique, que le Pape deuoit beatifier, &
qui ne deuoit rien, disoit-on, à la deuotion de no-

re Roy Loys XI. vray Prototype de telles pietez.

Mais ce fust bien au Parlement à se taire : car les Courtisans Cabalistes, secondez des Catholiques simplifiez, luy firent faire des seueres reprimendes par Monsieur le Nonce, à raison de tels controollemens qu'ils appelloient impietez, tout ainsi qu'aujourdhuy on appelle Heretiques, ceux qui descouurent les Catholiques piperies, dont se sert l'Espagnol pour nous perdre. Car c'est maintenant heresie que de donner auis aux François de penser à leur conseruation, aussi bien que durant la Ligue.

Et neantmoins, mes Peres, le temps qui est vn grandissime Docteur, a fait cognoistre que ces Françoises Cassandres, par leurs pronostiques, auoient bien auguré que ceste benoiste lampe esclaireroit tost ou tard, le grand chemin de Paris aux garnisons Espagnoles, que les mal-auisez Zelotes y appellerent sous pretexte de venir secourir Dieu & son Eglise en France, l'appetit d'vn si friand morceau leur faisant d'vn autre costé abandonner Dieu, & l'Eglise en Hollande & en Hongrie.

Plusieurs qui sont encore dans la Cour ont veu toutes ces choses, & Dieu qui ne veut pas qu'on se mocque de la Religion, permit que par les propres mains de ces deuots Cabalistes, non seulement cette superbe lampe, mais mesme le Crucifix d'or & tous les sacrez thresors de saint Denys, furent fondus, & confondus, comme si Nabuchodonosor, ou l'armée de Mansfeld y eust passé.

Mais quoy? quand Dieu veut punir les hommes, il leur oste l'entendement, ou par Heresie, ou par su-

perstitution : C'est pourquoy le Prophete au suiet de pareilles erreurs crioit , Allez ie suis d'aduis que voyans vostre malheur vous ne daigniez le voir, & l'oyans, desdaignez de l'ouyr, de mesme en est-il du siecle d'auourd'huy, qui est si remply de desnaturez François, qui ne veulent voir les maux pressans qui nous talonnent, estans si ambeguinez d'Hypocrisie, qu'ils osent mesme excuser les frauduleuses pietez de la Cabale estrangere, sans laquelle, disent-ils, en blasphemans contre Dieu & ses miracles, nostre Eglise seroit peut estre en pire estat qu'elle n'est. Et sur ce fondement pourry, la pernicieuse bigotterie du temps, va preschant par tout pour article de Foy, qu'il est impossible d'estre bon François & bon Catholique tout ensemble: & de là vient que plusieurs corrompus vont persuadant aux niais, que pour aller en Paradis il faut porter en sa pochette la clef dorée du Roy d'Espagne, comme font les Gentilshommes de sa chambre, ou autrement l'entrée nous en sera interdite.

O François, qui auez desja mis en oubly les malheurs qu'ont produit les zeles piperies de la Ligue, & les calamitez que les Sophistes Casuistes vous ont fait souffrir sous ombre de Religion! O Gaulois, disoit Cesar, qui ne vous resouvenez, ny des biens, ny des maux qu'on vous fait! O mes Peres, n'allez plus si viste dans vn aveuglement, ne censurez plus si legerement les Ministres qui veillent pour le salut de l'Estat, sachez que ceux qui sont plus Religieux que superstitieux, & plus iudicieux qu'Acariastres, sont guaris d'une erreur si palpable, recognoissans tou-

les iours, que les Rois & les peuples trouuent ordinairement de bien plus certaines precautions és vieux Registres des Parlemens, que és cahiers chiffrez des Elperlucats Transmontains & Partialistes courtisans, ainsi que Henry III. l'aduouia à son Parlemēt à Chartres, où il estoit refugié, apres que les deuots Ligueurs l'eurent chassé de Paris aux catholifiantes barricades.

C'est pourquoy aussi, mes peres, la cabale Estrangere trauaille tant pour decréditer les Parlemens, qui sont neantmoins les seuls solides arcabouts de l'Estat, & les plus asseurez sentinelles qu'aye la France pour descouurir, & s'opposer aux attentats des raffinez Charlattans du siecle, qui laissent le grand chemin Royal pour suiure leur ambition, laquelle ils ne peuuent assouir que par l'aneantissement des Loix, en reduisant par des plaussibles pretextes ces sages controolleurs de Catilinaires, en mesme predicament qu'ils ont enfin reduit cette pudique Sorbonne jadis tant celebre, & maintenant à demy decréditée, pour auoir par ses Decreets prophetisé dès l'assemblée de Poissy, la diuision que cette dangereuse Caballe feroit naistre parmy les Catholiques, en ces mots remarquables, *Ecclesia pacis perturbatua, &c.* laquelle prophetie a bien desmenty des Archiligueurs, qui publioient & publient encore, que les Decreets de la Sorbonne ne passent iamais la riuere de Seine: car elle a faict claiement cognoistre en peu de paroles à toute l'Europe, qu'elle auoit descouuert le mal, & que nostre diuision changeroit les Catholiques simples, en Catholiques composez *alias* Es-

pagdolifez, les subjets du Roy en Ligueurs, & la Religion en belle faction Estrangere, dont nais-
troient les troubles, saccagemens, sacrileges, &
parricides maudits, tels que nous les auons veu, &
voyons encore en ce temps, au grand regret des
vrais Catholiques François.

Mais quelques factionnaires ardans repartiront
icy, que si ces Oracles du Parlement sont si veridi-
ques, pourquoy le Roy à present a-il fait restablir
les Iesuites en leur College de Clermont, nonob-
stant leur opposition? Et pourquoy Henry III.
fit-il abbatre la Pyramide du Palais, esleuée par leur
Arrest? La response à cela, mes Peres, est, que le Par-
lement comme dispensateur des Loix, la deu faire
ainsi, & les Roys comme modérateurs d'icelles les
peuuent modifier, sans que leur clemence puisse
pour celataxer les Iuges d'iniustice.

Ce maudit excrement de Jean Chastel, par vn
endiablé prurit de faux martyre à la moderne, ayāt
attenté à la personne sacrée de ce grand Prince, par
vn coup de couteau porté en sa bouche, cuidant le
frapper au cœur, ainsi qu'a fait depuis le detestable
Rauaillac: Il se trouua par la confession de cet en-
forcelé parricide, qu'il estoit infecté d'abominables
instructions Mariannes, & Maranes, & que son
Pere Directeur de conscience, l'auoit nourry en
cette furieuse superstition, les documens en ayans
esté trouuez sur la table de sa chambre, où ce Sa-
thanique hypocondriaque zélé, n'alloit que trop
souuent, comme le deposa sa mere. Là dessus le Par-
lement condamna le Parricide & son Directeur
Casuiste à la mort, & ordonna que la maison où
estoit né ce ieune monstre seroit rasée, paury estre

elleué vne Pyramide, où seroit graué l'Arrest en
lettre d'or, pour memoire perpetuelle d'un si pro-
digieux acte.

Du depuis ayant semblé bon à vn si bon Roy,
pour des considerations du temps, d'enuoyer vn
mandement à ces iustes Iuges, pour faire desmolir
sans bruit ceste Royale Pyramide, & apres quel-
ques iussions, l'ayant de puissance absolue fait ab-
batre, qu'en peut mais le Parlement? Tout hom-
me bien sensé laissera-il de iuger, que par la desmo-
lition de ceste Pyramide, on en a eueue vne d'hon-
neur à ce venerable Senat, & vne tres.haute de
clemence au Tres-Clement Henry le Grand?

Mais direz vous, le Parlement a vû de tres se-
ueres reprimendes enuers les Peres Iesuites, & le
Roy au contraire les a receus fauorablement en
grace? Il est vray, & tout bon Chrestien non su-
perstitieux en admirant l'excez de la bonté de nos
Roys, ne laissera pour cela de louer publiquement
la magnanimité de ces sages Senateurs, d'auoir
prononcé le bannissement de ceux de ceste Socie-
té, à raison des malheurs qu'ils preuoyent de leurs
dangereuses maximes. Car vous pouuez bien iu-
ger en vos ames, mes Peres, que ce n'a point esté à
cause de leur pieté & zele enuers la Religion, leur
charité & diligence à catechiser leurs Escoliers &
Seminaires; leur ardeur à reprimer le Schisme, leur
estude à s'efforcer d'arracher l'yuraye du champ
de l'Eglise. Bon Dieu! il y auoit bien d'autres sym-
ptomes en la maladie d'aucuns de ces bons Loyo-
listes, plus simples que bons simplistes, auxquels la
Cabale astucieuse fait arracher à tous propos *Li-
lium* pour *Lolium*; sans qu'eux-mesmes s'en apper-

coiuent, à raison de *los Antojos*, que leurs correspondans Transmontains leurs mettent au nez, qui leur font faire deux besognes à la fois, n'en croyans faire qu'une. Ainsi le bon Pantalon voulant tromper son valet Zany, qui estoit trop gourmand, le faisoit manger avec des bezicles, qui representoient les morceaux de viande sur son assiette, dix fois plus gros qu'ils n'estoient: & par ce stratageme Zany pensant auoir bien mangé ne laissoit de mourir de faim, d'autant qu'il ne se repaissoit que de l'ombre: comme font encore tous les iours beaucoup de simples Capucins, qui s'entremeslent des affaires d'Etat, & qui gastent tout en pensans bien operer, d'autant qu'ils suivent les instructions de ceux qui sont plus Matois qu'eux, lesquels ne leur disent le *Tu autem* des menées, se servant de leur simplicité pour faire leurs coups, comme fait le singe des pates du chat, pour tirer les chastaignes du feu.

Que si les hommes par la scheté volontaire veulent ignorer les causes des mal-heurs suruenus à la France, par les monopoles de telles gens, les Anges le publieront vn iour tout haut, & feront cognoistre aux Acariastres factionnaires, la grande difference qu'il y a, entre le saint Ministère de la Religion, & le caché mystere de ces Peres.

L'institut premier des Iesuites, ainsi qu'il s'exerce à Rome, Madril, & autres villes d'Espagne, est de telle recommandation, que non sans cause vn Roy de Portugal les appelloit Apostollos: mais estant arriué qu'aucuns d'eux pour auoir esté paistris ou catechisez à Doüay, Arras, Dole, Bruxelles, Anuers, Naples, Milan, & autres villes, où s'impriment ces Liurets de *Mysteria Poluica*, & *Ad-*

monitio ad Regem Gallia, & où la Cabale estrangere tient ses bureaux & monopolles, se seroient laissé seduire plusieurs fois par obediēce aveugle, à commettre des erreurs visibles & sensibles à la France; cela les a rendus suspects à la Sorbonne, puis reprehensibles & iusticiables des Parlemens; Qui sera-ce là dessus qui demeurera si ahéurté à ceste fatale hapelourderie, de se fantasier que des Compagnies si celebres, les ait voulu reprimander sans sujet?

Quant on a executé Grenet à Londres, ce n'a pas esté à cause qu'il estoit de la sainte Societé du nom de Iesus, mais pour estre Authéur de la conspiration de la diabolique foucade d'Angleterre; Quand on a pendu en Greve à Paris le Pere Guignart, ce n'a pas esté pour estre Precepteur de Jean Chastel: mais pour l'auoir induit à tremper ses mains dans le sang de nos Roys: Et quand on a chassé du Louure le Pere Cotton & le Pere Arnoux, ce n'a pas esté au sujet qu'ils estoient Confesseurs du Roy: mais seulement pour ce qu'ils mesloient vn peu trop d'intrigues de Cour, dans les menus suffrages de leurs Breuiaries: Ainsi mes Peres, quand on chastie vn Religieux, ce n'est pas pour sa Religion, c'est pour ses fautes, & en tels cas, il ne faut pas crier à chasque bout de champ, qu'on en veut à l'Eglise, comme font les furieux Cabalistes de ce temps, ou les simplifiez Religieux, qui tournent toutes les affaires d'Estat en cas de conscience. On ne pendit point ce grand Predicateur Sauanarola pour estre Iacobin, ny pour auoir presché contre les deprauations du siècle, mais bien pour les auoir trop librement preschees: car il damnoit Papes & Cardinaux, Florentins & Lituois, deuant

qu'ils fussent morts, ainsi que quelques vns font à present, quand on ne fait point les choses à leur fantaisie. Ce que Sauanarola faisoit avec telle vehemence, que les peuples estoient disposez à perdre tout respect deu aux Magistrats d'Italie, de sorte que quand nostre Roy Charles VIII. alla conquerir le Royaume de Naples, il trouua fort peu de resistance en ces quartiers là, s'aidant de la fatale superstition des Italiens qui estoient comme hebetez par les Predications de cet homme qu'ils tenoient pour Sainct. Predications affectees, pareilles quasi à celles dont la Caballe se sert aujourd'huy parmy nous, pour beffler les François & affoiblir la France.

Lors qu'on fit pendre dans Florence l'Archeuesque de Saluati, ce ne fut point pource qu'il estoit Archeuesque, mais pour la conjuration par luy & ses partisans executée dans l'Eglise de sainte Reparde durant la Messe, contre Laurens & Julien de Medicis. Ce ne fut pas de mesme quand ils pendirēt le Cardinal de Pise, Legat du Pape, en son habit Pontifical: car ce fut vne action de Zeletes, pareille à celle des seize de Paris, quand ils pendirent Catholiquement le President Brisson, & de ceux de Tholose, quand ils mirent à mort ce fidelle seruiteur du Roy, le President Duranti.

Quand l'Empereur Charles Quint fit pendre l'Archeuesque de Zannora, & autres Prelats de la sainte Vnion d'Espagne, descrite par Gueuare, ce ne fut point que toute S. Vnion luy fut odieuse, mais le pretexte en estāt monopolé cōtre ses plus cōfidēs, il trouua expediēt d'en faire expedier les Auteurs.

A la verité aussi, quand les Roys ne remedient

bonne heure à tels faux-pieux attentats, qui sont capables de mettre les peuples en cōbustions, cōme sont les specieuses Cabales d'apresent, Dieu permet que le malheur tombe ordinairement sur eux les premiers: car par nature le peuple suit toujours le mauvais party, & appetite cōme les estomacs cacochismes, les choses qui luy sont contraires: C'est donc aux Parlemens à y remedier seulement, sans espargner ny faux Predicans, ny fols Predicateurs, qui soufflēt d'ordinaire aux oreilles d'une populace imprudente: autrement ils traîneroient encore avec leurs zelés indiscrets, les magistrats dans la Bastille, ainsi qu'ils ont fait autrefois à Paris; ou parmi les ruisseaux, comme à Tholose.

Sçavez vous, mes peres, combien de maux couue quelquesfois vn zele indiscret? pour le vous faire comprendre plus facilement, ie vous en veux faire la comparaison avec vn pueril accident arrivé de nostre tēps. C'est que durāt la Sacro-saincte Vnion, les habitans de Louviers en Normandie, laissoiēt faire à leurs enfans des petites processions zelée, à l'entour d'une Eglise du faux-bourgs, & portans chacun une petite chandelle ardante; il arriva qu'un d'entre-eux y mit innocemment le feu, dont les peres en porterent la folle-enchere, en ce que des materiaux de cette Eglise bruslée, on en fit cōstruire par apres une Citadelle en leur ville, pour leur apprendre à prier Dieu comme il faut, & à n'abandonner leur Roy, pour courir apres des phantomes & protecteurs estrangers.

Seroit-ce, mes peres, s'esloigner trop du vray, de comparer les simplifiez Religieux, qui mettent le feu, & troublēt sans y pēser leur patrie, par l'excez

de leur zele indiscret, à ces pauvres innocents, enfans de Louviers? le laisse cela à iuger aux plus iudicieux d'entre vous: c'est pourquoy ie soustiens qu'il est tres-necessaire que ceste aveugle obediēce des Religieux, soit illuminée par l'antique Sorbonne, & continuellement controollée par le magistrat, tout ainsi qu'en Italie, Espagne, où les souverains sont Maistres de la Religion & des Religieux, de l'Inquisition, & des Inquisiteurs.

Aussi est-il bien vray que c'estoit le dessein de Henry le Grand, en r'appellant les Iesuites en son Royaume, de s'en rendre luy mesme le pere Directeur; & de leur bailler pour General son Chancelier, pour prouincial son premier president de paris, & pour pere recteur, Monsieur son grand Aumosnier, mais le funeste coup qui mit ce prince au tombeau, a faict que tout a reüssi autrement.

C'est pourquoy ceux ausquels il reste encore vn peu de charité enuers la patrie, ont bien sujet de prier Dieu à joinctes mains, voire à chaudes larmes, que nostre roy Louys le Iuste, reprenne les arres de ce haut & prudent dessein. de ne leur nommer tels personages pour adjoincts: car s'il falloit qu'en ceste adoption par obediēce aveugle, ou par erreur zelée, ils prestassent encores tāt soit peu l'oreille à la cabale estrangere, soit directement, ou indirectement, nous pouuōs hardiment crier de bonne heure avec Saint Pierre, *Dominé salua nos, perimus*: & ne faut pas douter que nos Lys & nos Loix ne courussent grād hazard, principalement en cette veine de tēps, auquel la cabale s'efforce de fomentier vne guerre civile dans le Royaume, & d'establir des authoritez estrangeres au

preiudice de celle du Roy, & du repos de ses ſuieſts.

Vous pouuez aduoier, mes Peres, par le recit veritable des choſes cy deſſus, à combien d'erreurs ſont ſubieſtes les ſimples & Religieuſes perſonnes, quand ils preſument tout faire, *Ad maiorem Dei gloriam*: & en combien de pieges les plus deuots des Cloiſtres peuuent tomber, lors qu'ils ſe laiſſent piper à ce friant appas de ſimulée Religion en derriere du Souuerain.

Pour confirmer d'auantage ce que ie diſ, oyez d'abondant ceſte verité, de laquelle vous pouuez eſtre maintenant eſclaircis és perſonnes de Meſſieurs les Ducs d'Efpernon, & de Bellegarde, contre leſquels les Ieſuiſtes & Ligueurs ont tant & tant declamé, & maintenant ces bons Peres ſont contraints de ſ'en deſdire, recognoiſſans leurs erreurs paſſées, qui ont cependant cauſé tant & tant d'horribles deſaſtres, deſquels il ſemble qu'on ne ſ'en reſouuienne quaſi plus.

Si ſe doit on pourtant bien rememorer des execrables monopoles qui ont eſté faiſts à leur accaſiō, durant le Regne de ce trois fois bon Roy Henry III. que les furibonds Catholiques, par les complots de la Cabale eſtrangere chaſſerent de ſa ville capitale, & mirent en fin proditoirement à mort à ſainct Cloud, par l'organe d'un Moynetou, Cathéchisé de leur main, qui fut ſanctifié *ad tempus*, par ces ames maudites, qui en ſuite expoſerent le Royaume au carnage, pillage & deſolation.

Il y a bien peu de ces Zelateurs ſuruiuants, s'ils ne ſont opillez de lepre, qui n'abhorrent maintenant tout haut les pieux tours de paſſe-paſſe de ce temps là: Car beaucoup y alloient à la bonne foy, & ne failloient

failloient, comme on faict encore, que par contagion: de maniere que ce bon Roy pour n'auoir voulu croire les aduis de ses fidelles seruiteurs, ny sceu preuenir le mal qui se couuoit par l'artificieuse bigotterie des Ligueurs, il donna temps à la Caballe des Moynes de le descrier à les peuples, & de bouleuerfer son Royaume, tout ainsi qu'on faict à present par ce commun artifice d'extirpation d'heresie, vilipendans & deschirans d'opprobres, ses favoris de Ioyeuse, la Valette & Bellegarde, mais sur tout contre Nogaret, que le Roy auoit fait Duc d'Espemon.

Il ne se peut dire les furieuses maledictions, dont la Caballe fit accueillir ce nouveau Duc, le faisant publier & prescher par toutes les villes de France pour vn Archi-heretique, vn Athee, qui auoit esté au Sabat des Sorciers, qui auoit fait la Cene de nuict avec les Huguenots, puis le lendemain Communie avec les Catholiques: En somme vn Althoroth, Gauaston Gomorrhiste, iusques à le despeindre aux boutiques avec des cornes, hideux comme vn Diable qui tente saint Anthoine aux deserts.

Ce sage Seigneur scait, si ie dis la verité, & ceux d'entre-vous, mes Peres, qui estoient en ce temps-là se peuent resouuenir, que les plus seruens Religieux reformez, & renfermez, mesme les Predicateurs les mieux suivis, commentoient & mentoient à qui mieux mieux sur ses conuices, & sur tous les Iesuites, qui les attestoient sur le peil de leurs ames, estre tres-vrays, quoy que tres-faux, comme le temps la fait connoistre, ny ayant en France vn meilleur Catholique que luy, & qui expose encore tous les iours sa vie à mille hazards

D

pour la defence del'Eglise.

Il laisse cependant à ruminer à tous bons Peres contemplatifs, combien il a fallu d'annees, de mois, de quarante heures, de Iubilez, de vœux à Nostre Dame de Laurette, & de Mont-Serrat, & bastir des Chappelles aux nouveaux Conuents, à cet accord Cadet de Gascongne (ainsi l'appelloient-ils) pour estudier ces Calomnies, & se faire reconnoistre par ceux mesmes qui l'ont tant vilipendé pour vn autre Anticabaliste des Zelans, à la confusion de ses Corriuaux.

Monsieur le Duc de Bellegarde pour se garantir de leurs dents venimeuses, n'a pas aussi esté exempt de telles pieuses occupations. Ces deux Seigneurs Gascons ayans rendus des febves à ceux qui leur auoient presté des pois.

Autant les Ligueurs en ont-ils fait à toute la maison de Bourbon, afin qu'en d'escrians les heritiers, ils peussent plus aisément s'approprier de la succession Royale: Et pour remarquer bien clairement les mouuemens malicieux de cette Caballe qui vit encore, il ne faut que considerer ce qui s'est passé contre Monsieur le Prince ces dernieres anneés, es-queilles on l'accusoit fausement d'estre entaché de vices honteux: mais depuis qu'il a approuué la guerre dans l'Estat, & qu'il a esté à Rome, où il s'est assis apres le dernier Cardinal, on n'en a plus dit de mal, les Iesuistes ayans mesme approuué qu'il annexat l'Abbaye du Bourg-Dieu à son domaine de Chasteau-roux: Que s'il eust poursuiuy cette actiõ en vne autre rencontre de temps, il n'eust pas esté bon à donner aux chiens, tant les bigots eussent furieusement clabaudé contre luy, & par là les simples

Religieux peuuent remarquer que les espiegles Casuistes de ce siecle, tournant les choses de conscience selon les interests de leurs complots : Hel puis, mes Peres, allez vous mêler d'homelier sur les deportemens des Grands de la Cour, & principalement en vne saison où les diuers interests s'entre-choquent au despens du Roy & du public.

Encore cette histoire, la Royne Louyse femme pieuse de ce pieux Roy Henry III. presenta Requête à Henry le Grand, pour luy rendre Iustice de l'assassinat, commis en la sacree personne de son mary, il l'a renuoya au Parlement, elle y produisit ses griefs contre Bourgouin, Prieur des Iacobins de Paris, luy fait confronter des Iacobins mesmes, qui par leur deposition le rendent notoirement complice du Parricide Clement : Le Parlement condamne Bourgouin à la mort, comme conuaincu du crime de leze-Majesté, & les Ligueurs le preconisoient Martyr, aussi bien que l'assassin Moyneton, duquel le pourtrait a esté publiquement vendu dās Paris, Rome, & Madril, voire mis sur les Autels, non seulement comme Beat, mais comme bienheureux Martyr.

Or ie demanderois volontiets, mes Peres, si Bellarmin, Tolet, Suares, Manuël Sa, & autres modernes esplucheurs de cas conscience, pourroient sans enorme sophistiquerie accuser ce sage Parlement d'auoir rendu Iustice à cette Reyne vefue, & excuser legitimement les Zelez Ligueurs d'erreur abominable? d'auoir preuenu Rome à canoniser le parricide Clement, quoy que les anciens Docteurs de Sorbonne criaissent tout haut qu'ils n'auoient jamais veu, ny leu qu'on peut faire d'un

homicide, vn Martyr; & d'autres vrais Catholiques Theologiens preschans, que ces Iscariotes Zelants estoient vrais Pharisiens, Guelphes & Gibelins, non point Chrestiens? puis que de la Cour de nos Roys sacrez, & de toute la France, ils n'auoient pas de honte d'en faire sans horreur vn Acheldema, & vn Cimetiere sanglant. Ya t'il Casuiste qui puisse non plus approuuer, la voye de feu & de sang, dont on vse maintenant pour exterminer plus promptement les Heretiques; quand il considerera les grands fructs que l'Eglise tire aujourd'huy par le zele & pieté de plusieurs Seigneurs, Officiers & autres, qui se sont conuertis depuis trente, quarante & cinquante ans, les ames desquels seroient peries dans l'heresie, si on eust saccagé & tué tous les Huguenots, il y a 40. & 50. ans, comme quelques vns soustiennent qu'il faudroit faire à present, au lieu que l'Evangile nous commande de laisser croistre l'uyroie jusques à la moisson: les Apostres l'ont pratiqué ainsi? & ne voit on pas qu'ils ayent iamais eu recours au cousteau ny au glaiue, le salut des desuoyez deuant estre aussi cher aux vrais Chrestiens que le leur propre, estant tres-certain que les Zelez, sanglants & mutins, ont tousiours esté desplaisants à Dieu, & aux gens de bien.

Les Parisiens se peuent - ils resouuenir sans rougir du beau vœu de la Nef d'argent à Nostre Dame de Laurette, que Messieurs les seize leur firent faire apres le Siege leué par le Prince de Parme, puis que le succez a fait voir que cette deuotion n'estoit que pour les empescher de se rendre au Roy, l'Espagnol ne visant qu'à les entrete-

nir en leur rebellion, afin que la necessité les contrainst de se jeter tout à faict entre ses bras, comme ils firent gentiment apres; Vœu donc tres-im-pertinent, quoy qu'il fust appuyé du Legat Caie-tan, puis-que le but n'estoit que pour endurcir le peuple en son opiniastreté contre son Prince legi-time, iusques à abuser du nom de cette Reyne du Ciel, comme si elle se laissoit surprendre à la malice des hommes.

Voilà comme nos predecesseurs pour s'estre laissé niaisement apaster par tels pieux hameçons, ont cuidé bouleverser cette Monarchie, en appel-lans les Espagnols, qui sans doute eussent essayé de decretter ceste Couronne, s'ils n'eussent rencon-tré vn Henry III. & vn reste du bon Genie des Parlements, qui s'opposerent à ce faux zele des-naturé. A quoy aussi la surueillance du Pape Cle-ment VIII. seruit grandement en ce qu'il eust pitié de voir ces frenetiques François le laisser manger aux loups en despit des Huguenots, étant tres-certain, que si ces loups pieux de ce temps-là, eussent mis leurs pattes sur l'une de nos trois fleurs de Lys seulemēt, ils n'eussent gueres tardé par apres à engloutir la Thiare du saint Siege, *Benedictus Do-minus qui non dedit nos in captivum dentibus eorum.*

Or les Religieux simples, & les Catholiques composez, pour excuses contre tant d'aveugle-mens passez & presents, croyent estre bien lauez quand ils crient, Quoy donc? l'heresie sera elle touf-jours en vogue?

Deuant que respondre à cest eschappatoire, ie suppliray charitablement tous bons Peres de re-venir prealablement à eux, & d'avoir cette ferm-

30
croyance, mesme la faire sçauoir fraternellement
à leurs Generaux que tous ces excez de pieuses fre-
naïsses, enfantées par vn pretendu zele de Religion,
n'ont fait que diuiser les Catholiques, & diuisent
encore tous les iours les subiects du Roy; à quoy les
Parlements deuroient vertueusement s'opposer
s'ils auoient de la vigueur, la huiaille d'eust elle en-
core crier contre eux, à l'heretique, comme du
temps de la Ligue.

Certainement l'apprehension des bons Reli-
gieux de l'accroissance de l'Herésie, seroit non
seulement excusable, mais louable, si se frappans
maintenant la poitrine ils daignoient confesser,
que la precipitation des violens preparatifs de la
saincte Ligue, a esté la principale machine qui a
donné le vent en poupe à l'Herésie. Que s'ils disent
que nos guerres dernieres l'ont grandement abba-
tue, on peut respondre, qu'elles ont aussi grande-
ment releué le cheuet à l'Espagnol, qui nous menas-
se à toute heure de nous engloutir, en recompense
de l'assistance qu'il a receu de la France, en ces der-
niers troubles de Boheme, tant il est charitable: Et
par là il est bien difficile de iuger à present, qu'elle
herésie est la plus dangereuse pour nous, ou celle de
Castille, ou celle de la Rochelle?

Ainsi de tous nos maux, il ne s'en faut prendre
qu'à l'insidieuse pieté des Cabalistes estrangiers, qui
pour s'agrandir nous broüillent tousiours, ayans
l'industrie avec leurs Patinoïres, de faire mouuoir
les superstitieux, dont le nombre est infiny, iusques
à nous faire entre-bourrer quand bon leur semble,
par le seul mot de Religion.

Henry III. apres tant de combats sanglans,

dans lesquels on luy auoit fait risquer sa vie & son Estat, & apres auoir tant de fois tâté le poux à ceste heresie, reconnu à la fin par quelle Diette elle se deuoit guarir: & croyez, mes peres, que c'est vne maladie où les Religieux ne doiuent appliquer que des saintes prieres, au lieu des monopolles turbulens: ny les Predicateurs y toucher, que par l'aduis du souuerain Magistrat, sans l'assistance duquel toutes vos operations extrauagantes ne peuvent apporter qu'une suite d'erreurs sur erreurs, qui sont marques de tres-dangereux accidens en tous corps Politiques; estant mesme à craindre par les prestiges assez reconnus de cet hypocrite Cabale, qu'on fasse debiter aux credules François par ces Empyriques deuots, des qui pro quo dangereux, c'est à dire l'interest du siecle pour l'interest du Ciel; & que cuidant eschauffer l'estomach, ils bruslent le foye: car la plus-part de ces pieuses personnes s'aident du zele de Religion, ainsi que les vieilles bonnes femmes de village font du vin, qu'elles dōnent en cachette tout le saoul aux febricitans pour leur resioüir le cœur (comme les mouchars zelez debitent en secret les nouuelles de Milan, de Bruxelles, de Dole, & de Pont-Amousson, pour abuser les François) & bien que le patient en meure, elles en attribuent la cause aux Receptes des Medecins, tout ainsi que nos passionnez Cagots aux Parlemens & Politiques.

Mais sans doubte, quelque bon Religieux poura icy repartir en colere, & me reprocher comme à quelque fauteur, qu'il y auroit bien plus de raison d'exagerer la Cabale des Religonnaires, que de s'amuser à vesperiser les deffauts passez, & presens, des

zelez Catholiques; A cela ie respondray que mal sur mal n'est pas santé, les manquemens des vns n'excusans pas les folies des autres, & cependant ils doiuent trouuer bon qu'on leur represente naïfvement les sanglantes miseres dans lesquelles la France a trempé depuis soixante ans, par les monopoles des surueillans Estrangers, & qu'en suite de tant de méchefs qui nous doiuent tout assagir, qu'il leur plaise au moins escouter patiemment la voix de de ceste Sybille Françoisise qui nous dit, Que pour prudemment surmonter ceste Heresie, il se faut disposer de la combattre d'oresnauant par bons exemple enuers nostre prochain, & par charitables admonitions, sans continuer à nous harper tousiours au colet, ny acharner les vns contre les autres à coups de Chapelets & de Pseaumes de Marot, par vn zele sans science, qui nous porte insensiblement à negliger le salut de la Patrie, cependant que l'on s'amuse quelquefois à prescher frauduleusement le salut del'ame; & à donner des brocards contre la memoire de nos Roys, contre leurs Ministres plus fidelles, contre les Parlemens, voire contre la Sorbonne, pour haut loier nos ennemis & leur artificielle pieté.

I'appelle artificielle, celle qui par captieuses inductions apprend aujour d'huy sans bruit aux simples populaires à dire en mots problematiques, à la façon du Cardinal du Perron en sa belle Harangue des Estats sur l'indépendance de nos Roys; Il vaut mieux estre Espagnol que Huguenot: Il vaut mienx hazarder le Royaume, que la Religion. Il vaut mieux que le Palatinat & Iuliers soient és mains de l'Infante, que de nos Alliez Heretiques. Voilà ce
qui

qui se glisse dans les esprits, au lieu que la chaste Sorbonne enseignoit, Qu'il ne faut laisser perdre la Religion ny l'Estat, & encore moins estre Espagnol ny Huguenot, mais bon Chrestien, Catholique François, bon Patriote, pour viure & mourir dans l'Eglise sous l'obeïssance de nos Roys.

Telles astucieuses inductions, mes Peres, ne sont point de si peu d'importance, qu'elles ne puissent vn iour faire ruisselet bien du sang en France, en imprimans ainsi doucement dans les ceruelles credules telles pernicieuses erreurs, de sorte que quand nos Roys se banderont pour resister aux attentats qu'on tramera sur leur Couronne, il est à redouter que ceste artificielle pieté se rende maistresse des consciences de la populace, luy faisant croire (comme par le passé, & comme à present sur la necessité de la paix du dedans) que les resultats du Conseil de la Majesté sont autant d'heresies, & que pour aller en Paradis, il faut auement adhrer à la Cabale estrangere, qui seule en sçait le chemin, & qui veut que nous croyons que la guerre ciuile, est le salut des François; & que tout l'honneur du Roy est attaché au Fort de la Rochelle, & non à proteger ses alliez en Italie, & Allemagne.

C'est ce qui m'a meü, mes Peres, à vous représenter icy les subtils passe-droits des Matois Transmontains, qui sont cause de tant de folles imaginations, dans lesquelles croupissent beaucoup de bons Religieux innocens, & simplifiez: car pour les erreurs des Religionnaires, ils ont esté si bien vannez, gribelez & examinez, au feu & à Peau, qu'ils sont reconnus par tout pour tels qu'ils sont: Mais ceux de la Cabale estrangere, sous priuileges d'estre

flattez, ne sont pas encore bien connus parmy nous, d'où deriuent nos frequentes recheutes de guerreciuille; avec toutes les partialitez hargneu ses qui diuisent nostre pauvre France: car pour les erreurs des pretendus Reformez, ils sont tous les iours sur le Bureau, il les faut laisser aux Theologiens à desbeller, & aux Parlements à auoir l'œil sur leur Cabale, à ce qu'elle ne se puisse estendre plus outre qu'à protéger leur vie, & non à trahir leur Patrie, comme quelques desnaturez Ligueurs ont tenté d'exécuter Catholiquement. *Laqueus contritus est & nos liberati sumus*, estant à nous de prendre garde de n'y plus retomber. Il est vray & nul n'oseroit dénier que les Huguenots n'ayent grandement failly de s'estre emparez des vaisseaux du Roy, lors que sa Majesté estoit sur le point d'entreprendre de tres-bonnes affaires en Italie. Si les Catholiques leur pouuoient porter ceste estocade franche dans le cœur, il n'y a pas de doute qu'il y auroit de quoy les confondre, mais les mauuaises procédures passées font qu'ils recourent ceste faute d'un desespoir de ce qu'on ne leur a tenu parole des choses promises. Et en suite en recriminans ils accusent la Cabale, qui chercha le malheureux expedient du cousteau de Rauillac, pour ruiner les genereux desseins & grands preparatifs de Henry IIII. Ce maudit assassin auoit esté porté à ceste execrable action par les persuasions de certains zelez qui auoient mis dans son esprit, que ce bon Prince vouloit faire la guerre à Dieu & à son Eglise, & ainsi ont mis par ce diabolique stratagemme, ce Monarque dans le tombeau, avec toutes les genereuses entreprises.

Cependant qui engardera nos esueillez Casuistes de s'accoustumer (pour éviter tels miserables accidens) d'interpreter à bien les desseins de nos Roys, au lieu de les descrier quand pour le bien de l'Estat, ils resoluent quelque chose contre la volonté de la Cabale, & au contraire applaudissent à toutes les actions de nos Emulateurs, soit qu'ils vivent en bonne intelligence avec les Armeniens, soit encore qu'ils fassent Ligue offensive & defensive avec le Duc de Saxe, le Lantgraue, Darmestat, & autres Lutheriens, ou soit qu'ils fassent la paix honteusement avec le Turc, comme ils ont faict depuis peu, iusques à auoir abandonné plusieurs villages Chrestiens: (eux dix-je, qui reprouuent que nostre Roy raze vn Fort pour donner la paix à ses propres subiects.)

Il semble que l'on vueille ignorer tant de batailles que nos Roys ont donné pour esteindre l'heresie, & que la liberté de conscience qui a esté accordée en France, n'a esté que par vne forçante nécessité: Et si le Roy d'Espagne eust fait de mesme avec les Holandois, il ne les eust pas forcé à faire vne Republique, comme il a fait, de maniere qu'apres auoir employé toutes ses puissances pour les reduire, il a esté en fin luy mesme, réduit à traiter avec eux comme Souuerains, par vne Treue de douze ans, laquelle il voudroit bié encore renoueller, s'il pouuoit, ayant appris à ses despens aussi bien que nous, que ceste masse d'Herésie ne se peut de plain saut abbattre, sans accabler dessus elle les plus zelez pionniers.

Le Catholicissime maison d'Autriche, d'autruy riche, ne consent-elle pas les diuerses Religions

dans Vienne, Hongrie, Boheme, Morauie, Lussacie, & Silesie, & mesme l'exercice d'icelles dans le corps de ses armées : ce que nos Roys n'ont iamais toleré dans les leurs: Cependât les zelez n'en murmurent point contre les Archi-Ducs, ny ne les estiment moins bons Catholiques: pourquoy donc jettent-ils plustost leur venin contre nos Roys, que contre les autres.

A ces raisons, j'entends les Zelotes darder à leur mode des si, si, si : disans, si les Roys de France eussent fait cecy, ou n'eussent point fait cela, tout feust mieux allé : mais on leur peut aussi repartir, si les Ligueurs se fussent comporte en vrayz sujets: s'ils n'eussent point faict de Cabales contre leur Prince, s'ils ne l'eussent point chassé de Paris, si on n'eust pas donné tant de credit au Seize, si on n'eust pas tué Henry III. qui estoit bon Catholique, on n'eust pas fait eschoir la Couronne au Roy de Nauarre, qui estoit lors Heretique, si les François n'eussent presté l'oreille si legerement aux persuasions des Transmontains, comme ils font encore à present, le temps nous eust tous reünis, & ne fussions iamais entré aux guerres, esquelles nous sommes tombez par l'astuce de nos ennemis, lesquels n'ont autre mot du guet pour nous faire entr'assommer, que de crier a l'Heretique.

Il n'est donc maintenant question que des extrauagantes erreurs qui ont iusques icy partialisé les Catholiques, & ne s'agist en tout ce discours, que de faire veoir aux simples François la faute qu'ils commettent en postposans à nos Catons patriottes, des Porteurs de rogatons estrangers: Partialité cependant si contagieuse, que fort peu

d'ames piës, daignent s'appercevoir du peril eminent dont cest Estat est menassé par le Philtre sophistiqué de Religion, au moyen dequoy la Cabale tasche plus que iamais d'engluer les vns & les autres dans nos confusions, pour lesquelles desmesler, si tost que les bons Ministres de l'Estat y pensent remedier, on fait crier apres eux, par les credules bigots, voire par certains Predicateurs, & simples Religieux, comme apres des fauteurs d'Heretiques, pour ne vouloir estre fauteurs de leurs erreurs: & par là; le Roy peut reconnoistre combien les vrays seruiteurs courent de hazard, pour defendre le salut d'une nation, la plus credule, la plus superstitieuse, la plus ingrate, & la plus ingenieuse à se laisser tromper, qu'autre nation qui soit au monde.

Qu'ainsi ne soit, voyez avec quelle facilité l'Estranger nous a sceu embarquer en nos dernieres guerres de Religion, cette Cabale ayant eu la force de mettre le Roy en deffiance des Huguenots, & les Huguenots en deffiance de la bonté de la Majesté, leur faisans à croire que le Roy les vouloit exterminer, & persuadant d'autre costé à sa Majesté, que les Religionnaires vouloient faire des Republicques dans son Royaume, les faisans Conseillers soubz-main de ne se point despartir de leur assemblee, & de faire fortifier les places d'ostages, affin d'eschauffer plustost la resolution de prendre les armes: & tout cela si accortement conduit, que les Catholiques & Huguenots l'ont creu, & se sont là dessus acharnez les vns contre les autres, avec des furies inouïes, iusques à brusler des villes toutes entieres, & saccager des amples Prouinces;

ependant que l'Espagnol conqueroit des Couronnes, Duchez & Principautez dans l'Allemagne, iusques à nous faire abandonner nos Aliezz, sous couleur qu'ils sont Heretiques, avec lesquels neantmoins, il travaille auioird'huy de s'accommoder, afin de se rendre plus puissant pour nous mettre le pied sur la gorge.

Est encore icy à remarquer, que ceste Cabale, touchée du despit de ce que nos guerres ciuiles auoient pris fin par la paix de Montpellier, elle a encore eu la force d'empescher l'execution de ce Traicté, afin de laisser vn prompt leuain pour rejeter l'Estat en troubles, ainsi que vous en auez veu l'effect, les supposts de cette faction qui sont bien aises de voir continuer nos miseres, faisans courre par tout qu'il y a moins de honte pour le Roy, de laisser ruiner ses armées, & ses aliezz d'Italie, & d'Allemagne, que de razer le Fort de la Rochelle, tant ils ont peur de voir la France en paix. Et de fait, ils auoient vne telle apprehension que les Huguenots prissent confiance au Roy, qu'on fist en sorte pour les animer aux armes, que l'on commença dès Saumur à ne point faire obseruer les promesses de sa Majesté, ce qui fut continué en saint Jean d'Angely, Clairac, Bergerac, Pons, Lunel, & tous les restes des autres sieges, le tout à dessein de porter les affaires à l'aigreur, & pour empescher la paix. Par là, mes Peres, vous pouuez iuger qu'il y auoit plus de faction, que de zele de Religion. Que si l'intention de la Cabale eust esté bonne, elle eust meslé la charité, la douceur, & l'industrie dans les armes du Roy, pour ramener les desuoyez au giron de l'Eglise, & à l'obeissance: & non le feu,

le sang, & la fraude, pour les mettre aux champs d'avantage.

Et qui persuaderoit aujourd'huy aux François que les dernières guerres de l'année 1621. n'ont esté suscitées par l'Estranger que pour perdre le Roy & le Royaume, ie ne fay point de doute que la plus-part ne die, que ce sont comptes de vieilles.

Qui leur fera voir que le Roy à plus despensé d'argent, & perdu de gens en ces broüilleries de Religion, qu'il n'en faudroit pour conquister le pays Bas. Ils s'en mocqueront.

Qui leur dira, que les propositions des sieges de Montauban & de la Rochelle ne se font que pour engager le Roy en de tres-mauuaises affaires; Ils feront le nicquet.

Qui leur soustiendra que le temps fera voir que le razement du Fort S. Louys ne meritoit pas le retardement de la paix: Ils disputeront le contraire.

Qui leur monstrera, que c'est vne tres-mauuaise procedure de ne tenir la parole aux Heretiques, Ils s'en gaufferont.

Qui leur représentera que sous pretexte de l'extirpation de l'Herésie, on a ouuert la porte à toutes sortes; ie dis toutes sortes de Cabales prejudiciables à l'Estat, ils soustiendront que ce sont Fables.

Qui leur prognostiquera que la multiplicité des Conuents, & Colleges de Iesuites ruïnera la Religion & l'Estat, ne diront-ils pas rōuillant les yeux, & s'esleuans sur leurs ergots, que ce sont illusions diaboliques.

Qui leur voudra persuader, Que la France s'en va tantost bloquée comme Breda, ne s'en riront-

ils pas, en repartant que ce sont bayes, & cependant il n'y a rien de plus veritable.

Or pour mieux confirmer toutes nos erreurs presentes, il ne sera pas mal à propos de les conférer avec nos fautes passées, & par ce moyen donner lumiere à nos aveugles Zelez, lesquels se croyans Afferteurs de la Religion, demeurent sans y penser Deserteurs de leur Patrie, & de la Religion tout ensemble: Escoutez donc cest Epilogue.

Qui eust dit au commencement de la sainte Ligue, qu'on alloit tout gaster, & que les deuotes exhortations du P. Bernardin Iesuite, alloient exciter des prodigieuses Tragedies; N'eust-on pas crié, à l'Huguenot.

Qui eust dit, qu'il falloit faire pendre les plus huez & eschauffer des Seize, n'eust-on pas crié, Au Martyre.

Qui eust dit, que Henry III. auançoit plus la Religion Catholique, & ruinoit plus le Schisme par son exemple à la pieté, que ne faisoit le grand Pompée de la Ligue, en fomentant la rebellion des Parisiens, avec leurs funestes Barricades: N'eust-on pas crié: Au Catholique à gros grain.

Qui eust dit, qu'il falloit escouter aux Estats de Blois, ces anciens Prelats de Bourges, de Nantes, de Meaux, de Mande, de Beauuais, & de Chaalon sur Saone, que le Cardinal de Peleué appelloit Politiques: N'eust-on pas crié, Au faux frere.

Qui eust dit, que Monsieur d'Espernon n'estoit ny Huguenot, ny Fauteur: N'eust-on pas grincé des dents, & hué: Au meschant, à l'Athee.

Qui eust dit, qu'il y auoit plus de Marannes en Espagne, qu'il n'y auoit de Huguenots en France: N'eust-

N'eust-on pas crié; Au fauteur d'Heretique.

Qui eust en somme représenté aux Ligueurs & simples Religieux d'alors, vne infinité de telles faulx opinions, que la Cabale de delà les Monts leur faisoit pieusement croire, pour les embarrasser comme à present, és sanglantes miseres que la France a ressenties; N'eussent ils pas par leur zele bouillant tenuersé le fonds de la modestie Chrestienne, Pour recriminer; Il a le Diable au corps.

Et cependant, mes Peres, la France a veu l'esclaircissement de tout ce que dessus, & comme tout alloit autrement que ne preschoient les passionnez Predicateurs de ce temps-là: Et quād vous comparez les menées presentes, aux passees, vous trouuerez que la Caballe travaille sur le mesme pied qu'elle faisoit alors, & quelle vous persuade le faux au lieu du vray, & estouffe les bons aduis des gens de bien, tout ainsi qu'au temps de la Ligue.

Chacun a veu à quoy a reussi la pieuse tentatiue de ce P. Bernardin le suite, & comme toutes ses pretenduës deuotions n'ont produit que rebellions.

L'on a veu comme feu Monsieur du Mayne fut contraint d'accourir de Lorraine à Paris, pour y faire pendre vne partie de ces Messieurs les Seize, qui furent appelez Martyrs par les Predicateurs Boucher & Commolet.

On a veu pareillement les Propheties accomplies de ces sages Prelats, tant descriez & regardez de trauers aux susdits Estats de Blois, à la façon que la Cabale descrie encore auiourd'huy, les bons Prelats qui defendent le Roy & l'Estat.

Le temps a fait aussi voir comme la Catholique Espagne, estoit remplie de Maranne, & comme le

Conseil de Castille en a exilé plus de huit cens mil; le Pere Portugais ayant dit de son vivant, qu'il en restoit encore plus portans Patinoſtres, qu'il n'y a de Huguenots en France.

Et pour le regard de Monsieur d'Espernon, les Peres Iesuites voyēt bien à present si les meschancetez que la sainte Ligue a vommy contre luy sont veritables, pouuant maintenant apprendre de sa bouche propre *sub sigillo confessionis*, s'il a iamais esté autre qu'il est. Et toutesfois, mes Peres, ce zele sans science de recourir à telles erreurs plausibles, est tellement enraciné en quelques debiles ames de beaucoup de bons, ie dis bons Religieux & Predicateurs, que leur simplicité est capable de coniuer encore aux monopoles de quelque nouveau Cabaliste, Messie, s'il s'en presentoit, en contre-faisant le defendeur Machabee de la Foy : Estant à noter que ces ames credules, quand elles viennent à abhorrer les salutaires conseils du souverain Magistrat, ressemblent naïfvement aux enfans innocens qui regardent de mauuais œil les Chirurgiens, qui leur ont remis quelque os disloqué: De mesme les Zelez enuifagent les Parlements & Vniuersitez, pour les vouloir guarir de leurs faux scrupules.

Quelque deuot Espiegle obiectera icy qu'en aduoüant les erreurs passez & presens, c'est estaller trop publiquement les destauts du siecle, à quoy ie repliqueray qu'il vaut beaucoup mieux confesser ses pechez, & se corriger, que de persister dans le mal, quelque bien pretexté qu'il soit; voire que c'est obeyr à Dieu que de rentrer prudemment dans le sentier de verité, & dans le grand chemin Royal, comme aussi vne grande loüange que d'e-

estre blasmé en bien faisant.

Pour exemple, nostre Roy Louys, quoy que tres-Religieux, n'a pas si tost escouté les propositions de la paix avec les Huguenots, que la Cabale s'est mise à murmurer contre sa Maïesté, faisant glisser dans les esprits des idiots que ceste paix est honteuse, & qu'il vaut mieux qu'il risque sa Couronne pour exterminer l'heresie, que de veiller aux affaires du dehors pour sauuer son Royaume.

Et qui repassera sur la vie de S. Louys il trouuera qu'il s'est laissé emporter dans les mesmes fautes de nos guerres zeleees, pour auoir entrepris avec vn zele trop ardent, le defastreux voyage d'outre mer contre les infideles, les censeurs attribuant ce specieux pretexte, duquel la Cabale se sert encore à present, à vne accortise de quelques vns de ce temps là, qui estoient bien aises, comme on pourroit estre à cette heure, d'embarquer pieusement ce Prince en vne entreprise loing taine pendant laquelle ils accommodoient leurs affaires aux despens de la France.

Ne murmura-t'on pas aussi contre la Majesté à cause de la cassation de la Polette, supprimee par les aduis des Notables du Royaume, notablement assemblez à Roüen : & deux mois apres par les miracles de nos desordres ordinaires, on la ressuscita miraculeusement ; tant nous prenons de peine à paruenir bien tost à la ruine de cet Estat, dont la Cabale en rit sous son voile de fausse pieté, lequel à tant de force par les prestiges de sa capharderie, qu'il a fait perdre non seulement les escrimes, mais si i'ose dire, la vie à trois ou quatre de nos Roys : c'est pourquoy Henry III. a esté taxé de trop de

grande debonnaireté, & Henry III. blasmé de trop grande clemence, laquelle luy deuoit tousiours mettre deuant les yeux, le cousteau de Clement, & nostre Roy Louys, celui de Rauillac.

100 Tout cecy soit dit en passant, mes Peres, tant pour vous munit contre les censures du vulgaire tousiours errant, que contre les fausses inductions des broüillons d'Estat, qui abusent de la Religion, & de la credulité des Religieux, & aussi pour apprendre aux Catholiques composez, qu'il n'est permis aux suiets de blasmer son Roy, ny son Conseil, n'appartenant qu'aux Parlemens, aux Princes de son sang, ou à quelque saint Praelat, de venir à l'humilité du Prophete Nathan, l'aduertir de ce qui pourroit defaillir en luy.

101 Pour le repos donc, que ie desire à tous bons Religieux, ie les coniureray que pour s'affranchir de tant d'erreurs, qu'ils ayent à rentrer en eux-mesmes, apres l'invocation du S. Esprit, & alors ils trouueront par bonnes inspirations, que la sacree Sorbonne & Parlement de Paris, sont les vrais Phares sur lesquels on doit ietter les yeux durant ceste Cabaliste tempeste : ces deux celebres Compagnies estās aussi scrupuleuses de faire quelque chose mal à propos, en ce qui concerne la Religion & l'Estat ; que les Bigots ambitieux sont coustumiers de suivre les Conseils captieux, pour accommoder leurs affaires au detrimēt de celles du Roy, & aduantage des Estrangers qui les interessent : l'harmonie de ceste Monarchie ayant tousiours esté concordante, quand les Cours Souueraines ont tenu la mesure, quoy que les subtils Casuistes puissent alleguer du contraire.

Car comme vous sçavez, mes Peres, tout se ren-
 uerle par les Escritures, Canons, Decrets, & Ar-
 gumens, sophistiquement appliquez aux desseins
 des Cabalistes, parmy lesquels le faux Dieu inte-
 rests preside, reuestu du sacré mâteau de Religion,
 tout chamarré de Catholicon corrompu, qui a touf-
 iours seruy de couverture aux factionnaires Estrā-
 gers, comme la verge de Mercure, pour endormir
 les superstitieuses ames, qui preferent au euglemēt
 les sanglants Axiomes de la Catholicité moderne
 des Transmontains, aux simples & Chrestienment
 Maximes de l'antique Sorbonne.

Or pour euitier les perilleux escueils, cachez
 sous les sauoureuses eanēs de la pieté, ce ne sera pas
 petite prudence aux vrais Religieux, de s'abstenir
 désormais de regarder si curieusement dans vne
 abisme si profond, tel qu'est celuy de l'embaras
 des interets du monde, de crainte que la cernelle
 leur tournant, ils ne se precipitent dedans : C'est
 la raison pourquoy les vrais Catholiques sont en
 continuelle apprehension, quand ils voyent au-
 iourd'huy tant de Moynes frequenter les Cours
 des Princes, trotter les ruēs & negotier bien auant
 dans les intrigues du siecle, iusques à vouloir gou-
 uerner toutes choses selon leur fantaisie claustra-
 le, d'autant que tout cela retourne à la confusion
 des Estats, & grand scandale de l'Eglise, de laquelle
 ils se disent si Zelateurs, & mesmes contre les an-
 ciens instituts des Monasteres.

Au demeurant, mes Peres, sçachez que vous
 acquerrerez plus d'honneur, & edifierez plus vo-
 stre prochain, en vous contenant Religieusement
 en vos maisons, que d'estre continuellement dans

les familles à embarasser les esprits de la sublimité de vos claustrales Meditations. Et quand quelques factieux vous yront visiter d'icy en auant dans vos Celules , apres l'Angelique salutation de l'*Aue Maria* , s'ils vous viennent à parler du Roy , de la Royne, de Monsieur le Prince, des deportemens de Messieurs les Ministres, de la negotiation de Monsieur le Legat: mettez vous aussi tost en l'estat d'un bon Religieux qui va celebrer la sainte Messe, disant. *Pone Domine custodiam ori meo*, & apres qu'ils vous auront respondu, & *ostium circumstantie labiis meis*, Dites ensemble les yeux au Ciel, Dieu sauue nostre Roy, & sa Maison Royale, avec tout son bon Conseil.

Que si pat apres ils continuent à vous entretenir sur ces triuiales questions; Pourquoy Henry le Grand entreprit-il la Protection de Iuliers en faueur d'un Protestant, à l'exclusion de l'Archiduc Leopolde Archi-Catholique?

Pourquoy le Roy ne rompt il l'Alliance avec les Estats de Hollande? & soustient-on qu'il est necessaire pour le bien de l'Estat de faire Ligue offensive & defensiue avec Angleterre?

Pourquoy n'a-ton aussi tost choisi le Marechal de Bouillon que le Marechal d'Esclignieres pour le conuertir avec la charge de Connestable de France?

Pourquoy Luynes s'est il plustost ietté entre les bras des Iesuites, que des bons Peres Chartreux?

Pourquoy n'assiege-ton la Rochelle, puis que Pompee Targon offre de la prendre aussi facilement que les pigeons de l'Abbaye de Poissy.

Pourquoy le Roy ne fait-il pendre ceux qui ont

volé l'argent de l'armée d'Italie, & Vendu les places?

Pourquoy le Pape a-il oublié la qualité de Roy de Nauarre, dans la Bulle du Legat?

Pourquoy a-ton supprimé les importantes Lettres que le P. Arnoux auoit escrites pour son reſta- blissement en Cour?

Pourquoy le Nonce Curcino se faſcha-il tant deuant Montpellier, de ce que le Roy auoit tenu parole à la Capitulation de Sommiers, voulant qu'on leur manquast de foy, comme à ceux de Lunel, & autre places qui s'estoient renduës?

Pourquoy n'a-t'on auſſi bien veſcu en paix avec les Huguenots depuis cinq ans, que l'on faiſoit durant le regne de Henry III. & la Regence de la Royne Mere du Roy?

Pourquoy ne chaſtie-t'on les Capitaines & Soldats qui font tant de mal aux pauvres villageois, & qui cauſent tant de ruine dans la campagne?

Pourquoy y a-t'il tant de diſputes entre les Peres del'Oratoire & les Carmes Deſchaux, pour con- fesser les Carmelines?

Pourquoy le Pape a-il annullé la ſentence de l'aſ- ſemblee du Clergé, contre le Docteur Luitre, au grand meſpris des Prelats de France?

Pourquoy le Comte de Godemar a-il dit dans Paris qu'il eſtoit bien mal-heureux de n'auoir pas peu faire ny deſſaire vn mariage?

Pourquoy les Ieſuites vont-ils par les maiſons des plus riches demander les enfans pour les auoir à Penſion?

Pourquoy le Roy a-il eſté conſeillé d'abandonner la priſe de Iuliers & le Palatinat aux Eſpagnols?

Pourquoy vn premier Prince du sang de France, s'est-il allé asseoir à Rome apres le dernier Cardinal.

Pourquoy ceux qui preschent tant le Ciel aux Princes, sont-ils si ardans d'acquérir la terre?

Pourquoy le duc de Bauière, qui est si deuot, retient il iniustement les pays du Prince Palatin, son proche parent?

Pourquoy se sert-on auourd'huy plustost du Donat que de la Bible, pour conuertir les Huguenots?

Pourquoy Monsieur le Legat est-il plustost venu en France qu'en Espagne?

Pourquoy toutes les villes dans lesquelles il y auoit des Iesuites, se sont-elles rebellées contre Henry III. comme Paris, Tholozé, Bordeaux, &c.

Pourquoy nos Euesques les plus zelez aiment-ils mieux suivre la Cour que de résider dans leurs Dioceses.

Pourquoy le procez du P. Guïot Iesuite a il esté enuoyé de Roüen, puis reballotté, au grand mespris de la Iustice Royale?

Pourquoy le Legat a-il voulu reduire Messieurs les Euesques de France au Mantelet comme simples Vicaires?

Pourquoy Rome hait-elle tant les Conciles Nationaux, les libertez de l'Eglise Gallicane, & les Appels comme d'abus?

Pourquoy dans ce siecle Bigot, se trouue-il moins d'habiles hommes, & de gens de bien, que iamais?

Pourquoy le Pere Des. voisin sollicitant contre Theophile, disoit-il, aux Iuges qu'il leur recommandoit la cause de Dieu, de la Vierge Marie, &

de

de tous les Saints?

Pourquoy faut-il que les Iesuites gouvernent toujours la conscience des Roys de France, & que les Roys d'Espagne ne se confessent jamais à eux?

Pourquoy ne recherche-on aussi bien les concussions des Officiers de Justice, comme on a fait les voleries des Financiers?

Pourquoy le Legat a-il amené avec luy Fude-
mon un Iesuite, qu'il scait auoir escrit à l'en-
contre de nos Roys?

Pourquoy le P. Rosuuey d'un Iesuite appelle-il les Catholiques, qui defendent l'authorité des Roys, Catholiques Royaux, Demy-Christiens?

Pourquoy les Venitiens, quoy que bons Catho-
liques sont-ils appelez Ichismatiques, & pires que
Turcs, par les Espagnols, & leurs haciendaires?

Pourquoy le Pape a-t'il donné pleniére Indulgen-
ce à tous ceux qui yroient à la guerre pour la de-
fence de Genes?

Pourquoy a-on brûlé Tonins, Negreplisse,
Mon hurt, Saint Paul, Chomont, & autres pla-
ces, au lieu de les conseruer au Roy?

Pourquoy laisse-on tant de hapeleurdes en des
charges importantes, dont le service du Roy n'en
va pas mieux?

Pourquoy employe-on auourd'huy plustost des
Capucins que des Iesuites pour negocier?

Pourquoy les François sans y penser font-ils
plustost les affaires à l'aduantage des Estrangers,
que de l'Estat de France?

Pourquoy par le Concile de Trente, est-il dit,
que les Bulles des Papes seront obseruees contre
les Conciles généraux?

Pourquoy nos Conseils ne produisent-ils plus des resolutions genereuses, mais seulement des accommodemens tousiours bialans & traisnans?

Pourquoy le P. Arnoux dans ses chiffres a-il appelé le P. Segueran, Tabarin spirituel?

Pourquoy les Massorets murmurent-ils de ce que le Roy se confie en la fidelité de Baradat?

Pourquoy le Legat Cajetan lors qu'il estoit en France, s'opposoit-il tant à la treue & à la paix?

A tous ces subrils Enquesteurs vous leur pourrez dire à l'oreille. Chers amis, toutes ces questions ne sont point Rubriques de Breuiare: mais quand à celles qui touchent la conseruation de nos Aliances, encore que i'en entende rien au triquetras du monde, ie vous renuoyeray neantmoins à l'escole des grands Estats, tant Ecclesiastiques que autres, sur pareils cas, lesquels n'ont iamais estimé contrarier à la volonté de Dieu, des'allier avec les infideles & heretiques, mesme de se seruir de leurs secours pour protéger leurs peuples des orages qui les menaçoient, comme a fait depuis peu l'Espagnol bon Catholique avec le Duc de Saxe bon Lutherien, leur but n'estant en cela de fauoriser les schismatiques, mais d'obeïr à cette voix qui crie incessamment, qu'on prenne garde qu'il n'arriue quelque accident à la Republique, s'estant trouuez assez de grands Pontifes, & Papes, qui se sont dispensez d'en vser ainsi, se pouuant remonstrer à nos scrupuleux François Espagnolisez, que ce doit estre assez de creue-cœur à la France d'auoir souffert qu'on nous ait iniustement vsuré la Nauarre, & rauy par l'ayde des forces de l'Empire, la souveraineté de Flandres & d'Artois, sans endurer enco-

re que par l'adionction des Duchez de Cleues, Iuliers, & Palatinat aux Pays-bas, ou vienne à tous momens nous accrauanter iusques aux portes de Paris, comme ils ont fait à S. Quentin, Cambray Amyens, Cattelet, la Capelle, Dourlans, Calais, Ardres, & ailleurs, durant nos Ligueuses partialitez, le tout faute de nous estre seruis vtilement des Protestans pour nous defendre en nos necessitez.

Considerez cecy, mes Peres, nul d'entre vous, ny de ceux qui ont vescu à Rome, n'ont iamais douté de la probité & sainte vie du feu Cardinal d'Ossat; & cependant dans ses œuvres vous y pouvez remarquer en plusieurs endroits, qu'il ne reprouuoit la ligue offensive & defensiva que le feu Roy auoit fais avec la Reyne d'Angleterre Elizabeth, comme aussi celle que ceste Couronne a eu de tout temps avec les Princes Protestans d'Allemagne; En ce que sur l'instance que le Pape Clement VIII. faisoit de les rompre, il a bien osé escrire à Henry le Grand, & à son Conseil, que c'estoit l'interest de la Sainteté & d'Espagne qui le portoit à solliciter vne telle rupture, & non le bien de la France. Voicy les propres mots desquels il vse en sa lettre 81. du 3. Liure de ses Missiues; Et sa Sainteté trouue bonne toutes façons de separer sa Maesté d'avec ses Alliez, pource qu'ils ne sont Catholiques, & ne recognoissent le Saint Siege, encores que lesdites façons fussent infames & domageables à sa Maesté, & à son Royaume: & pouruen que la separation s'en ensuiue, ne se soucie de l'aduantage & accroissement qui est pour en aduenir au Roy d'Espagne, ny du des-bonneur, danger & diminution qui en peut resulter au Roy & à toute la France, quand les Espagnols se seroient rendus Maistres de l'Angleterre. Par

ainsi, comme ie suis d'aduis que nous excusions sa passion, aussi me semble il que nous en eussions nous en tenir d'autant plus sur nos gardes. Par lesquels propos vous voyez, mes Peres, que les interets des Papes peuuent estre quelquerois contraires & domageables à ceux de nos Roys, & ainsi ne deuez murmurer quand les Ministres du Conseil, la Sorbonne, ou les Parlements, n'aquiescent à tout ce que voudroit bien le Saint Siege, sans que pour tout cela ils puissent estre reputez moins Catholiques que les Italiens & Espagnols.

Et quant à la protection de Iuliers, sans alleguer les raisons d'Estat, vous pouuez, mes Peres, reprendre, *salua conscientia*, ceux qui l'ont tant blasmee, & leur dire, *gens absque consilio & Prudentia*, &c. de ne vous resouvenir que la France, s'estoit par droit vendiquee ceste protection deuant que Luther, ny Calvin fussent au monde, y ayant eu guerre pour ce sujet dès le temps de François I. ne s'agissant point en ce fait de la Religion, comme tels trompeurs bigots le publient. mais de l'interest des deux Royaumes, l'un ne voulant plus souffrir qu'on entreprit d'auantage sur luy? & l'autre faisant profession, les Patrimoines en la main, d'entreprendre sur tous les Princes de l'Europe; la vicissitude des temps, ayant voulu par rencontre qu'un Electeur Marquis de Brandebourg Protestant, se fust mis sous la sauuegarde de Henry le Grand, comme l'Empereur Charles Quint auoit du temps de Henry second recherché sans scrupule un autre Marquis de Brandebourg Albert Chef des Protestans, pour luy ayder à reprendre Mets sur la France. Et le Roy d'Espagne Philippes II. bon

Catholique, s'il en fut iamais, n'a pas aussi de conscience de se Ligner avec force Seigneurs Protestans, pour nous venir combattre à la iournée de S. Quentin.

Que s'il estoit loisible, mes Peres, de vous entretenir de tous les tours qui se font sous telles astucieuses superstitions, on vous pourroit assurer, sans beaucoup d'offense qu'en la place Nannonne à Rome, en celle de saint Marc à Venise, à la Bourée d'Anvers, & sur Pont neuf de Paris, on dit sourdement que tous ces ressorts de guerre de Religion qui se fomentent dans les entrailles de la France, n'ont esté pratiquez, & ne se pratiquent encore aujourdhuy parmy nous par l'Espagnol, que pour nous piper en nous affoiblissant, & fortifier les desseins dans l'Allemagne & Valtoline, de laquelle il s'estoit Catholiquement emparé, ce qui doit servir de tres belles leçons aux François pour leur faire cognoistre les violens progres de ceux qui faisant mine de se rendre Protecteurs de la Religion, aspirent à se rendre Dominateurs des Estats d'autrui.

Et qu'il ne soit ainsi, vous notterez, mes Peres, que l'Espagnol apres la trefue finie de Hollande, n'a voulu renoueler la guerre des Pays bas, que lors qu'il a veu le Roy engagé au siege de S. Iean d'Angely, iusques là, que la Cabale auoit si peur que les Huguenots ne s'obstinassent pas en leur rebellion, quelle fit des Saumur tout ce qu'elle peut pour les aigrir, tant par les inexecutions des Traités que par milles algarades qu'on leur fit faire ouvertement & sous main, afin de les porter dans l'irreconciliation: les ennemis de la France ne pouuans

recevoir vn plus grand desplaisir, que de voir la paix dans ce Royaume : Faisans encore tous les iours leurs efforts pour persuader par leurs Partisans, quel'Estat est perdu si le Roy n'assiege la Rochelle & Montauban, qui est tout ce qu'ils desirent pour acheuer leur entreprisede, faisans declamer contre ceux qui penettent trop auant dans leurs menées, ou qui les trauerfent comme font Messieurs les Ministres: le Cardinal de Richelieu, n'est pas mesme exempt de leur dent, les Cabalistes voulans faire croire aux simples François, qu'il est fauteur d'heretiques, parce qu'il ne peut approuuer que les Estrangers nous duppent, sous pretexte de Religion, ny autrement: ny qu'ils fassent dans la France, ny dans l'Allemagne, tout ce qu'ils desirent pour aduancer leur Monarchie par la perte de la nostre.

Ainsi la Ligue, & les Ligueurs clabaudoiēt contre le feu Cardinal de Gondy du temps de Henry III. parce qu'il ne pouuoit souffrir qu'on abusast les pauures Parisiens, lesquels sous pretexte de chasser l'heresie de France, notez mes Peres, furent portez à chasser leur propre Roy hors de son Louure, pour recevoir les Espagnols en sa place, comme ils firent miserablement: Cependant le temps a fait voir à ce peuple, apres qu'il a esté des-abusé, que ce bon Prelat auoit raison de s'opposer aux factions qui se tramoient alors contre son Prince, & que si les habitans de Paris l'eussent creu, ils ne fussent tombez dans la rebellion, ny souffert les miseres que les Seize, Fourbes de la Ligue, leur firent souffrir, ny mangé tant de chats & de rats qu'ils mangerent.

De mesme peut-on dire aujourdhuy de la malice de ceux qui censurent les salutaires conseils du Cardinal de Richelieu, & des autres Ministres, en ce que la suite fera voir qu'ils sont autant zelez à la Religion & à l'Estat, que les bigots Espagnolisez sont Destructeurs de leur Patrie.

Or le plus grand mal qui se rencontre en la continuation de telles erreurs : c'est que la pauvre France infectee de ce zele indiscret, sert de risée à tous les voisins, gisante, nauree comme ce Quidam qui descendant de Ierusalem en Iericho, *ceciderat inter latrones*: mais il y a pire encore à craindre; c'est que Dieu & les Anges ne nous reprochent, que *Sacerdos & Levita praterierunt, Samaritanus autem misericordia motus est*, Car on nous pourroit dire que le Samaritain Huguenot, quelque persecuté, pillé & baffoué qu'il ait esté, n'a iamais pour tout cela renoncé à sa Patrie; n'y encore moins desiré de l'asservir aux ennemis d'icelle, comme quelques fols zelez ont cuidé faire, & font tous les iours. C'est pourquoy afin qu'il ne nous soit rien reproché, montrons nous autant affectionnez à la Religion, & à la Patrie que nos anciens Peres, & ainsi retournons de nous mesmes à l'Hostel, comportons nous si sagement, que nous fassions petit à petit reuenir nos Samaritains compatriottes à l'Autel: Et au cas que quelques accartiaftres viennent crier, *Nos legem habemus*, & qu'il ne faut qu'une Religion en France, vous leur pourrez respondre, que cela descend de Dieu, plus que du Pere Veron, & par consequent plus de nos prieres que de nos armes, lesquelles nous ne scaurions reprendre qu'à la confusion des vns & des autres, c'est à dire en bon Fran-

çois, qu'avec l'entiere ruine de ceste Monarchie:

Que si les simples Religieux n'ont point leu nos hystoires de France pour apprendre nos calamitez publiques, ce sera charité de les y renuoyer, afin qu'ils y voyent les horreurs de nos longues guerres ciuiles, qui ont seruy d'escalier à la grandeur Espagnole & Italienne. Que s'ils repliquent mes Peres, qu'ils n'oseroient les lire sans permission de leurs Generaux Transmontains, brisez gentiment là dessus, & les faisant entrer dans vostre Oratoire, montrez leur vn Dieu de Pitié, & leur dites à cœur ouuert; Voyez vous bien, mes Freres, le Sauueur du monde lié & garotté? Il n'est pas neantmoins si attaché, que quand les interessez Potentats de la cabale, qui mettent les souffre-douleurs en besongne pour tuer nos Roys, le comporteront en vrais Chrestiens, il fera plus en vn clin d'œil pour son Eglise, que tous les subtils stratagemes couverts du retrain, *ad maiorem Dei gloriam*, ne feroient en cent ans, ny en cent combustions ciuiles, qu'on baptise guerres de Religion.

Que ces trompettes de sedition fassent donc leur profit de la reprehension que Nostre Seigneur Iesus-Christ fit à Sainct Pierre, pour auoir mis la main à l'espee sans commandement, & alors Dieu fortifiera son Eglise de legions invisibles, quand il verra que ceux qui font profession d'estre les vrais Sectateurs, detesteront ainsi que fait la Sorbonne, tous les faux pieux menlonges, diaboliques monopoles, assassins de Roys, diaboliques fougades, degasts inouïs, Lignes secretes, & dangereux equiuoques, vrais magasins d'abus, le tout au grand scandale de la Religion Chrestienne; n'y
ayant

ayant rien de plus certain que les Religieux & autres, qui ont recours à ces damnables extremitez, ressemblent dans leur desespoir à ceste forcene Dido, qui disoit,

I'lectere si nequeo superos Acheronta mouebo.

Ainsi quand ces Tragiques Transmontains desisteront de transformer nos peuples francs, & enragez gladiateurs, & Catholiques furieux, il ne faut point douter que Dieu ne donne sa benediction sur la France, & sur tout, quand ils laisseront de transubstantier nos Chrestiens baptisez en infernaux Rauaillacs: C'est pourquoy Dieu a manifestement crié par son Prophete; Quand vous leuez les mains au Ciel, ie ne vous exauceray point, car elles sont pleines de sang: & par l'Apôstre saint Iacques, reprochant le zele indiscret; Vous demandez, dit-il, & vous n'obtenez rien, parce que vous demandez mal à propos. Ainsi tous nos monopoles ont esté d'autant plus detestables qu'ils ont tousiours esté palliez de son saint Nom.

Renuoyons donc desormais ces crialleurs de Religion, Religion, *Templum Domini, Templum Domini*, aux Pharisiens Iuifs qui auoient plus de zele à contester, que de volonté d'obeyr à Dieu, de peur qu'il nous aduienne ce qui aduint à ces Zelotes, lesquels s'opiniastrecent tellement à fomen-ter la sedition, qu'ils aymerent mieux perdre leur Patrie, leur nation, leur Royaume, & ce noble Temple de Ierusalem avec leur Religion, que d'escouter la raison, & payer le tribut à Cesar, comme Iesus-Christ leur auoit commandé.

Or si iamais les Zelez eurent occasion de ne re-

tomber en ces erreurs, & horreurs; c'est maintenant qu'il a pleu à Dieu par vne grace celeste, donner à la France vn Roy tres-Chrestien, vne Royne Mere tres-pieuse, & vn conseil tres-Catholique, qui n'est ny Espagnol ny Huguenot, ne respirans vnanimement que la conseruation de la Religion & de l'Estat.

Et d'autant que les affaires du Royaume requierent qu'il soit coupé broche à toute faction, & d'empescher qu'il ne se fasse plus de courraterie de Religion avec l'interest de l'ambition, il sera bon pour le salut public, que defenes soient faictes aux François d'en trafiquer d'oresnauant avec les Italiens & Espagnols, comme de marchandise de contrebande, iusques à ce que la Iustice des Consuls Royaux y ayent apporté vn reglement; avec inionction aussi que quand les Catholiques & Huguenots boiront ensemble, ils mettront de l'eau dans leur vin, principalement en celuy d'Espagne, qui par ses fumees nous fait entrebattre à plaisir, pour donner beau jeu aux accorts spectateurs de la farce de nos folies Françoises. En quoy, mes Peres, les bons Religieux meriteront beaucoup plus, trauaillans à nous reconcilier tous charitablement, qu'à tremper dans des monopoles honteux pour nous infatuer iusques à ce poinct, que de nous reduire à la haine contre nostre prochain, & à oublier ce que nous deuons à nostre Patrie.

Or pour monstrier que plusieurs des François n'ont plus de zele que pour la faction estrangere, & non pour l'honneur de nos Roys, il ne faut que remarquer le peu de ressentiment qu'ils ont de

l'insolente vsurpation de la Nauarre, le vray patrimoine de nostre Roy, que l'Espagnol detient à la barbe de la France, sans auoir autre tiltre que l'effronterie de le posseder par droit de bien seance, & sur vn esprit emané de la fantaisie de quelques Theologiens nouveaux, qui veulent qu'il soit en la puissance des Papes d'oster les Royaumes & les Souuerainetez aux legitimes Seigneurs : surquoy ie demanderois volontiers que si Leon II. a trouué bon que l'Espagnol vsurpast la Nauarre sur Ieanne d'Albert, parce qu'elle estoit Huguenotte, pourquoy, mes Peres, sa Saincteté ne trouue-t'elle iuste qu'il le rende aujourd'huy à Louys XIII. son heritier qui est tres-Catholique, & qui a faict iusques à present tout ce qu'il a peu pour l'auancement de l'Eglise? Y a t'il Casuite qui puisse approuuer qu'on despoüille sa Majesté, de sa legitime; & encote moins que Rome ait oublié de luy donner le tiltre de Roy de Nauarre, dans la Bulle du Legat, apres tant de traux & de despenses qu'il a faict pour complaire au Sainct Siege. Si les François auoient du sang aux ongles ils ne souffriroient iamais ceste iniuste detention, de laquelle cependant ils font si peu de cas, qu'on peut dire, qu'il y a plus de personnes qui sont bien aises que la chose soit passée ainsi, que de ceux qui en sont marris. Aussi parle-t'on si peu de ceste iniuste detention, qu'au contraire d'en tirer raison par armes, on fait tout ce quel'on peut pour la conseruer à l'Espagne, iusques à luy procurer le chemin à la conqueste de la France par nos guerres intestines, auxquels les pauvres François prennent si grãd goust.

qu'ils s'y precipitent aueuglément, sans considerer que tout le jeu ne se fait que pour les perdre, & en nous consommans dans nos confusions, nous faire perdre aussi quand & quant tous nos Alliez, lesquels indubitablement nous perdrons si nous ne les secourons promptement ou bien s'accommoderont à nos despens, s'ils perdent vne fois l'esperance d'estre assistez, ou s'ils recognoissent la France en estar de ne les pouuoir assister, qui est la chose la plus pressante, à quoy on doit remedier.

Il fait bon, mes Peres auoir du zele, mais tout ainsi que vous sçauiez qu'apres prescher il faut quester pour viure, aussi deuez vous sçauoir que pour subsister il faut auoir de l'amour pour la Patrie, autrement vos zeles indiscrets mettroient tout sens dessus dessous, & deuez apprehender nos frequentes recheutes; d'autant que l'Estat est possible plus malade que l'on ne pense, en ce que nos maux sont implicites, & par consequent fort difficiles à guarir, voire impossible si on continuë d'y appliquer tousiours les remedes que nous donne la faction estrangere.

*Vn malade s'expose à vn danger tres-grand,
Lors que pour Medecin son heritier il prend.*

La France pour auoir trop presté l'oreille iusques à present aux persuasions des Transmontains, doit assez sçauoir ce que vaut leur drogue de Catholicon eluanté, qui l'a pensé sans de fois mettre au tombeau. C'est pourquoy si les François sont sages, ils ne les croiront plus si legerement, & penseront d'oresnauant à leur conseruation, & à celle de leurs Alliez, qui s'en vont tantost ruinez, ou qui

prendront party à nostre preiudice, comme i'ay desia dit cy dessus, n'y ayant aucun d'eux qui ne soit aujourd'huy dans oppression, & que ne soyons obligez de secourir, en ce que leur perte auance la nostre.

Angleterre, Dannemarc, Sauoye, Venise, les Estats de Holande, les Suisses, & tous les Protestâs d'Alemagne souffrent, & ont le poignard dans le sein, attendans tous les resolutions de la France: cependant l'armee Nauale du Roy de la Grand Bretagne se consomme & perd le temps: le Duc de Sauoye est attaqué dans ses pays, & crie apres nostre secours: Venise se voit menassée: le Roy de Dannemarc retire son armee: Tilly est dans les terres du Duc de Brunswic: les Suisses sont diuisez: tous les Protestans accablez: les troupes de Mansfeld dissipées. Si en tout cela il n'y auoit que l'Herésie opprimée, il n'y auroit dequoy s'attrister: mais les Estats de ces Princes tombans en la puissance d'une domination ambitieuse, qui garantira la France des attentats de ceux qui n'ont pour objet que leur Monarchie vniuerselle?

Que si en ceste mauuaise conjoncture, on embarque le Roy au blocul, ou siege de la Rochelle, comme nos voisins le desirent avec passion, & que la paix demeure d'auantage à faire dans le Royaume, il ne faut pas douter que tous nos Alliez se desbaucheront de l'affection qu'ils peuuent auoir de se joindre d'intérêt à ceste Couronne, si ennemie de son repos, & au eugle à son salut. Et ainsi, mes Peres, ce sera proprement brusler nostre chandelle par les deux bouts, que de nous destrui-

renous-mesmes & abandonner nos dehors à la discretion de la maison d'Austriche, qui en fera comme des choux de son jardin. Et le pis est de tout, qui assure que durant ce siege la Cabale ne seme des graines de nouvelles factions, ainsi qu'elle fit du temps de Henry III. pendant qu'elle occupa ce bon Roy à guerroyer les Heretiques, de la mesme façon qu'elle nous veut occuper à present ?

Ne croyez pas, mes Peres, que tout cecy soit de si legere consideration qu'il ne merite bien d'estre pesé & repesé, si nous n'auons enuie de tout hazarder de gayeté de cœur. L'aduouë que les Huguenots se peuuent facilement ruiner au point où ils sont : mais ie soustiens qu'il est tres-dangereux de l'entreprendre en ceste rencontre de tēps, que les affaires du dehors sont pleines de perilleux inconueniens, tant pour ceste couronne que pour nos Alliez: Je sçay bien que le saint Siege priera Dieu pour les armes du Roy, & qu'il luy conseiliera de ne se point arrester en si beau chemin, ses interests l'obligeant à parler de la sorte: mais les iudicieux François soustiendront qu'il est plus certain pour sa Majesté de toleter, que de tout hazarder pour les vouloir perdre prematurement.

Je suis d'accord que c'est chose fascheuse de leur laisser des villes d'hostages, les Catholiques Ligueurs ont esté blasmez d'en auoir demandé à Henry III. aux Estats de Blois, d'autant que les subjects ne doiuent auoir autre abry, ny autre seurété que la Foy du Prince, de laquelle il doit aussi de son costé estre tres-jaloux obseruateur. Que si

sa Majesté par vn bon Conseil pouuoit reduire les choses à ce poinct-là, elle feroit beaucoup pour le bien de ses affaires, pourueu qu'elle teint la main à ce que les choses promises fussent punctuellement obseruees & executees, par chastiment esgal aux contreuenans, le deuant ressouuenir que la S. Barthelemy & autres manquemens ont esté cause de la deffiance, qui ont par apres porté les Princes de ce temps là à demander des villes de seureté: Maintenant qu'il a plu à Dieu benir les armes de nostre Roy, il est certain que sa Maiesté en retirera vne double victoire, si elle prend resolution de donner la paix à ses subiets, plustost que de s'embarquer derechef en des desseins de guerre dans son Royaume, qui ruinent tout à fait le pauvre peuple tant de l'vne que de l'autre Religion: ne pouuant trouuer, mes Peres, plus pressante raison pour le persuader, sinon que les Transmontains n'apprehendent rien tant au monde, que le Roy donne la tranquillité à son Estat, preuoyans que sa Maiesté en retirera de l'aduantage, & eux vn tres-grand reculement en leurs affaires.

Prions Dieu, donc, qu'il nous ouure à tous les yeux: Et vous, mes Peres, ne pipez plus autrui en vous pipans vous mesmes, sous pretexte d'extirper l'Herésie & auancer la Religion: Ne rembarquez plus les esprits dans nos confusions ordinaires, *Nesorte veniant Romani*, c'est à dire, en bon François, de peur que l'Espagnol ne vienne, & face vne capilotade des Catholiques & des Huguenots pour seruir de gorge chaude à son ambition aux despens de nos sottises; Vous ressouuenans que le Comte

de Godemare a fait son entree à Fontaine-bleau,
 & à Paris dans vne litiere, assis sur vne belle chai-
 ze persee, pour monstrier qu'il n'est venu que pour
 conchier tous les François, auxquels *lo bexo las ma-*
nos, les coniurans tous de mieux faire que par le
 passé; Et le monde s'en esmerueillera.

*François, de BilleZ vous les yeux,
 Apprenez pour vous & les vostres
 Qu'il n'y a gens si fatieux
 Que des porteurs de Patinostres.*